

國

朝

文

匯

國朝文匯甲前集目錄

卷十六

張自烈

字爾公號苞山江西分宜人前明諸生入本朝不出有文集鈔本

續師說

郭泰論

劉巨塘述畧序

澹甯齋集序

陳子前後詩集序

明資政大夫孟公傳

明全守一傳

徐潛夫詩序

俞節孝傳

秋潭崔先生墓誌銘

劉城

字伯宗安徽貴池人前明諸生入本朝隱居以終有文集鈔本

隱公論

十一

九

八

八

七

五

四

三

二

一

一

四皓論

十一

池州防守議上

十二

池州防守議中

十三

池州防守議下

十五

鄭公奏議焚餘草序

十八

汪思誠傳

十八

嚴首升

字平子湖南華容人前明歲貢生鼎革後避跡不出著有賴園詩文集

江陵詩社序

二十

雲夢山人傳

二十

黃氏女羅氏合傳

二十一

毛先舒

字推黃浙江仁和人前明諸生有思古堂集小匡文鈔東苑文鈔

攝主論

二十三

出處論

二十三

厚解

二十四

釋巧

二十五

西湖子貢通越祠記

二十五

沈去矜墓誌銘

二十六

沈孝女墓誌記

二十七

談

遷

初名以訓字瑞木又字觀若浙江海甯人前明國朝隱居不出著有詩文集未刻

治河議

二十九

黃石齋先生遺事

二十九

國朝文匯甲前集卷十六

續師說

張自烈

唐韓愈既師道不古。著師說以貽李生。蓋謂學無常師。師無少長貴賤。恥師則愚。以益愚。陸象山亟稱之。余意聖師賢長師少。貴師賤似也。然猶有進於是者。歐陽修曰。世無師。學者當師經。或又曰。賢人師聖人。聖人師萬物。夫經以貫道。其人亡而其書存。非有語言相謀授。苟從而師之。傳道解惑。胥是焉在。若夫萬物則異類耳。何師之有。然古者師蠱立君臣。師蜘蛛立網罟。師拱鼠制禮。師戰蟻制兵。前民利用。皆於物是取。豈獨郊子師襄可師哉。雖然。師經師萬物求善而止。不善則廢。猶未盡師之道也。書曰。主善為師。師善也。孔子曰。其不善者而改之。見不賢而內自省。師不善也。至於不善皆師。則萬物之可師者衆矣。孰謂善師者徒求諸弟子哉。然則不求師失之妄。專師善失之隘。能師不善。則日進無疆。惜夫退之告李生者不及此耳。或問何以師不善。曰。毋自欺。內自訟而已。入道自寡。過始寡。過自求。師始求。師自省。身始不自省。而徒屑屑焉求吾師而從之。雖終身遊仲尼之門。若享子陳亢革模範儼然。惡在其能傳道解惑哉。

郭泰論

士君子進退死生之際毅然不欺其志不汲汲求知於世反諸心可以無疚質諸友可以無慙乃猶有執一隅之見以訾之者余於漢黨人郭泰不能不悲其遇而竊歎後世苛論者之過也泰博學厲行恥浮稱初游雒陽最莫之識陳留符融者一見嗟異介以覲河南尹李膺膺曰林宗通朗高雅今鮮其儔由是名震京師既而交范滂滂曰林宗隱不違親貞不絕俗諸侯不得友天子不得臣若此者皆深知泰者也皆非阿所好者也史稱泰性明知人好獎訓士類不為危言忤世見黃憲袁閎徐穉則友之謁仇香則師之逢遇孟獻則勸令遊學就成之泰卒四方士千餘人來會葬同志為刻石立碑然後去泰生平梗概蓋如此世儒不詳考其人不畧迹原心謂泰與世浮沉出處無據苟免黨禍巧於取名何詆誣之甚也或曰林宗交李范同時名士無免者何獨苟全林宗固不可與申屠蟠同年而語也余謂泰不罹黨錮不隨曹爽蔡邕赴董卓徵召以壽終知天下必亂退身教授子弟以千數黃瓊辟太常趙典舉有道皆不應視蟠絕迹梁碭雖殊其先幾明結一也安見泰必不能為蟠謂泰與蟠皆馳誤也泰與陳寔同為黨人其志同其道同所不同者迹耳方膺等下黃門北寺獄辭連陳寔寔以黨人散亡購捕方急自往請囚中平元年黨禁除四年寔始卒未嘗以誅死使泰必駢首與李范同死寔何以全軀與泰同不死也謂同時名士皆不免

秦獨的全誤也。或曰：黨禍由名士有慕誘而後有標榜，有標榜而後有誹訕。秦為八顧之首，已知其事。人罹其害，人以免為過，已以善全為高。林宗果何術至此？余謂標榜首三君，俊及顧尉次之。三君者，陳寔、賈武、劉淑也。八俊首李膺、杜密等次之。八顧則首郭泰。范滂尹勲次之。禍初萌於李膺之案，殺張成，繼潰於陳蕃之議，誅曹節。非自郭泰始也。泰非樹標榜肆誹訕者也。李范死，泰慟哭於野，曰：漢室滅矣，當是時泰獲免禍者，不立異不府怨故也。必以首禍咎泰，誤也。或曰：泰非獨愧李范二賢，胡廣依違外戚，連姻宦寺，天下有譏之者。林宗以名高相掩，故人不得而非之。范丹嘗深鄙郭林宗賈儔節之為人，丹之不就王奐，視泰之假榮同舟，誠為不類。平時引勢以為重，遭難倖免以為能。丹鄙泰未為過也。余謂廣嫌阿尸位周流四公，宜貽譏萬世。泰終身不仕，豈得與廣比？丹介而不能通泰，通而不失介，氣類懸絕，故齟齬不相入。丹非洞見泰之顯過，與潛窺泰之隱惡，能纖指其事以短之，既不足深信。同舟者一時賓友晉接之常，猶徐孺不拒著榻耳。苟以是為假榮，則就榻信宿皆假榮也。皆平時引重遭難的免也。何卒無損其為高蹈也？賈儔節說賈武霍諝為黨人，訟免其識慮誠有過人者。硯固如丹，必恒懦不敢任，必拱默不敢言，不審丹何所見而必深鄙之也。黨人可鄙者，莫踰張儉。亡命苟免，禁解還鄉，夏馥所謂一人逃死禍及萬家。

儉也。非泰也。儉豈非郭賈二子所羞稱者哉。泰豈負愧李范宜為丹所鄙者哉。論者謂泰以名高掩瑕。譏廣而不非泰。不知泰以行高蒙垢。疑泰而過信丹。尤誤也。以余觀黨人任氣矜名。疾惡如仇。匡救失圖。雖公忠自誓。身陷楚辱者。可謂無過。林宗懷憂時之志。恕以耦眾。樂與同善。故弗違甯處不告勞。無拯亂之才。退以守正。與物無競。故屢瀕艱險。不嬰禍。記曰。殺其身有益於天下。君子優為之。孟子曰。可以死。可以無死。死傷勇。若泰者。殺身無益。可以無死者也。不欺其志。始終自處裕如也。嗚呼。泰曷可厚訾哉。

劉巨塘述畧序

余考巨塘劉公之遇故相國分宜。深有感於盛衰之際。竊歎後世為相者之不能以分宜為戒。而事權相者之不能以公為法也。分宜立朝本末。著在史乘。置不論。獨公後先與分宜周旋。正直平恕。雖見述略中。余意公當日有進於是者。公不盡言。後人亦莫之悉也。嗟乎。公自處何如哉。方分宜柄用。華亭附藉江右。自固陰擠分宜去。分宜敗。坐世蕃不道棄市。輒解藉。未幾華亭罷。新鄭入。華亭故門下士附新鄭。馳至吳。風郡邑刺華亭蒼頭不法。文致其三子論戍。鄉者諸搢紳為余言如此。夫華亭媿阿分宜。畏禍耳。新鄭傾華亭。修怨耳。公令宜邑時。分宜勢灼中外。屹然不為屈。比公守

哀而分宜死。使如新鄭之修怨。不下石。可謂厚矣。顧汲汲改葬。不以先是嘗軋已而憾之。嗟夫。視華亭新鄭相去逕庭哉。世傳陸文定吳介肅二公。恥附分宜。或不往謁。或自罷。公於二公。蓋易地皆然。公自處何如哉。雖然。分宜無足道。以余聞華亭江陵內江諸人。彼此排斥。非古大臣公爾忘私意。去分宜一間耳。豈盡傳者妄歟。抑皆不能無過歟。詩曰。方茂爾惡。相爾矛矣。刺尹氏不平也。夫東國成而修怨不平。孰甚罪。豈在尹氏下。藉諸相國正直平恕如公。惡至端揆荆棘哉。此余所由益歎公不可及也。公政事在哀。哀至今誦之。余從里中聞故相分宜所為如彼。公後先遇分宜如此。是非久乃定。豈惟余不能阿鄉人。余抑豈阿公者哉。友人劉聖初痛其曾王父為權相所軋。持公迷畧與其尊人書來金陵。請余序。聖初蓋習知余不阿者。因序以歸之。嗟夫。盛衰之際。若分宜者足悲矣。後世卒不寤。何哉。

澹甯齋集序

昭陽映碧李先生。敦躬行。寡嗜好。鍵戶著書。至老不倦。集成台疏議史論序傳記贊考辨書牘引說題跋墓表若干卷。以書偕集來。屬為序。余竊謂先生幼穎敏。長壯治古文辭。日益工。既通籍。官諫垣。鯁亮聞天下。甲申洎今二十餘年。潛遯抗節如初。人非必俟集而後顯。集不待余言而後傳。已念唐舊史詆韓愈。盤孔孟。晉陶潛宋家鉉。

翁一載隱逸傳。附元文類。知先生如余。烏能終默默也。即今先生集盛行。家誦其書。人服其博。求其論定。無毫髮謬者。無幾。非先生難知。能深知先生者難也。或曰。忠似屈平。閔雅如賈誼。陸贄奇聲如樊宗師。元結楊億。故傳或曰。屈憤自沈。騷近賦。賈策罕適用。憤類屈。陸劄狀善匡拂。病儼樊。元楊三家務怪特。較賈陸濶遠甚。先生屏絕襲蹈。其於忠去憤。其於古茹紕去疵。未見其孰似也。余聞而歎曰。之二說非誣。潛見表遺裏耳。余往瀏覽是集。部分以索之。參伍以通之。見其上準春秋。彙括諸史。暨列朝實錄。下逮裨官。胙說雜志。靡不旁搜詳覆。補缺正偽。助涑水紫陽諸儒所未及。世未有考史如先生之備者也。論跋褒忠黜佞。謀死懼生。爭萬世是非者。史也。疏議條軍國利害。釐定文武臣贈諡。存一代典章監戒者。亦史也。推而之於傳記。辨訛畫夜激揚。風刺不稍假借者。皆史法也。蓋先生生平之學。莫深於史。其本則在於不自欺。昔周子謂誠者聖之本。若拙賦見志。鄉原巧偽。賊道。故孔孟惡之。先生嘗曰。無自欺。則真儒。巧自欺。則奸雄。誠哉是言。奸雄之視鄉原。強弱差殊。其始也習欺。同其究也流禍。同。近代詞章家。身負重垢。警然慕詩賦。盜浮稱者。奸雄也。胙合婞阿。進熟當路。巧譽人自譽者。鄉原也。先生惡奸雄。必惡鄉原。似故也。然則說者或喜似。或絀似。不進求先生居恆不自欺之志。余無取焉耳。至於先生性忠孝。傷心禾黍。寤寐靈號。

由天植素裕。求無自欺而止。儕輩顧孰是以推大之舉。古今臣子艱貞所自致。與先生之發乎性無所勉者。駭其為絕德。為獨能。慮非先生所樂聞。余先是遇四方同人。每歷指集中洪武首科記。南渡春秋序。諸篇反覆告語。環向雪涕。重其人。悲其遇。不能不暴其心。然卒未嘗數數咄嗟稱道者。誠以當時亡國諸公卿大夫。雖委蛇退老。罔裨名教。與視息偷陰等。先生不幸居後死之地。忘疾餒。外非譽。尊尊著書辨惑。不遑暇。可謂獨任其至難。所無慙於君父者甚苦。有功於鄒魯源洛者甚深。非鄉者。慟西臺。錮鐵函。區區絕群。齎恨。為足以盡先生也。嗟乎。今世踵躡先生者誰哉。能深知先生者誰哉。余故取其集。折衷眾說。詳加論定。為之序。使後有所考。使不至如唐宋史傳之謬誤不足信。庶幾無遺憾云爾。

陳子前後詩集序

余友陳子滌岑。輯生平撰著錢諸梓。己卯至甲申為前集。乙酉洎甲辰為後集。集成屬余序。余既深歎詩古文之足傳。尤竊慨滌岑之遇不稱志也。前後整比史例。其植節厲行感時閔俗之意。世未必盡知。知滌岑如余。卒不敢抗言以告世。嗟乎。為滌岑者。不亦難哉。雖然。古大儒不能違者天。所自信者心。心隱微不可見。仲尼至聖猶曰。莫我知。要之仲尼非求知於世。謂人知無當於世知耳。余瀏覽元史郡志。先以學行

節義特聞。凡百餘人。趙江漢金仁山吳幼靖。守待己任。後世承學無間言。虞集同恕。安熙武恪蕭軒諸人。與時委蛇。變不失正。迄今讀其書。愀怛如見其人。無他。迹晦而心無疚故也。滌岑少負才。湖湘礪石先生家學。博貫六經。諸史百家言。甫弱冠。講悉天下大計。求適用。獨不幸絀於有司。罔克自著見。乙酉。應薦參軍事。諸條畫疏議上。政府樞曹。鑒鑒可施行。會權姦并午不報。未幾。陵谷代遷。滌岑日銜酷如荼。家中落。久逆為親。屈於京師。壬辰。幸通籍。真引疾退休。子舍捷戶。著書如初。或諷滌岑曰。王茂才李伯紀顧獨終老耕垓。何哉。滌岑左右顧弗答。一日。余過滌岑山中。丙夜環坐。俯仰疇昔。相向出涕。滌岑輒拊膺號慟。至失聲。嗟乎。為滌岑者。尤難哉。因憶劉文靖至元中。擢右贊善大夫。教國子。以母老辭歸。俸給一無所受。已復徵為集賢學士。稱疾固辭不就。楊文憲元初。屏居教授。隨諸道進士試東平。兩中賦論第一。泚漕司十年。請老。晏堂曰。歸來。著還山前後集百卷。今迹滌岑所遭歷。視文靖文憲二公何如。况二公皆預朝參。滌岑雖登第。未之官。不俟秩滿而後歸。未嘗食祿以求去。就令世不盡知。揆諸江漢仁山數君子。其無疚乃心一也。余私諡其子堂謀曰。天穹然而幽。人傑然而昧。史寂然而微。默時知滌岑者。雖非所逆睹。滌岑之天之史。具在。庸何傷。滌岑聞而歎曰。然。至於滌岑前後集。進可以拯時難。退足以明名教。度非文憲諸人。

能頡頏天下後世公見之故畧然則滌岑即不幸躬際其難遇不稱志是集傳其亦庶幾自慰矣

明資政大夫孟公傳

公諱紹虞字聞叔號元鉢其先山東亞聖裔遠祖當元末避地祥符中更河患徙杞遂為杞人七傳至湖富學行累贈通議大夫禮部左侍郎兼翰林院侍讀學士湖生栢起家鄉進士為興濟縣令累封通議大夫禮部左侍郎兼翰林院侍讀學士子九人公第三生而穎敏性孝友角州就外傳不苟談笑學日進年十五補博士弟子員通六經折衷聖賢大義語人曰士期實用漫羨獵時榮吾恥之父喜萬歷癸卯弱冠領鄉薦甲辰報罷歸雖食貧力學不稍倦癸丑第進士改庶吉士丙辰授簡討凡六曹掌故邊方利害政令得失靡不考究暗記天啟壬戌分校禮闈補經筵講官歷贊善諭德記注起居纂修兩朝實錄管理誥敕補日講官丙寅擢少詹晉正詹事充纂修副總裁當是時逆璫魏忠賢擅政公以位望預枚卜璫陰倚公翼己思市德於公廷推甫上沸傳欽點者四人公居三適崔呈秀投刺求見公公拒不見許給諫在坐問故公曰崔必承璫指挾揆席唱我不拒臣節掃地矣崔厲聲曰何以報魏公及相見崔屏人語良久公微辭遜謝崔不澤去璫由此銜公以巧言撼上意追改前旨三人

並入直獨紉公。公亟請告不允。推禮部侍郎復留中。頃璫果密遣邏卒環邸第。圖所以中公不得間。未幾題升南禮部侍郎。得旨孟紹虞數陳明愷。講讀著勞。留用原缺。另推來看客曰。聖眷隆渥。璫烏能拒格公。公弗答。然璫方藉奉聖具。謁璫。璫舉朝重足立。同官草稱頌。疏授屬春。私呼公賊。名上之。公見疏。眦裂思持疏自溺。念疏非己出。無愧乃心。奈何危衆攘名。迫止。尋擢禮部侍郎。會熹宗崩。天公思乞休。弗果。崇禎改元。上初御經筵。公以巨奸未殄。每進講。引古帝王明斷。寓譏。上歛容稱善。枚卜廷推公第一。公曰。此非揆席。咄我者。藉是報聖主。當死生以之。亡何。上倣古金甌覆名例。以故卒失公。公無纖芥見顏面。擢禮部尚書兼翰林院學士。充纂修實錄副總裁。講讀如故。實錄成。加一品服。俸。陰一子入監讀書。公嘗條畫禮部興釐十二事。以聞。皆報可。故例。凡貢賓達部謁尚書。率致映獻。郎以下稱是。然後得免。屢宴賞。還國。諸藩王襲封祭葬。大世子及妃夫人。求所不應得者。往往納重賂倖得之。上下因循。弊非一端。損國體乖祖制。莫二者為劇。公於貢賓獨御以誠信。既絕獻遺。復嚴求下吏。無敢漁奪為姦。遠人咸悅。一日。秦藩宗室真鉉者。求襲封屬故所善。進金為公壽。公瞿然謂仲子曰。汝曹大父暨大父。世讓產。未嘗厚自殖。吾歷官五十年。祿仕交際外。不苟受一錢。皆汝曹所親見。今以亂法故得金萬計。輒妄覲非分。父不忍為也。麾之。

去。公生平廉忠類如此。時璫欲初熄。執政者憚上英察。務欺罔塞罪。公自度不能有所匡言。大乞骸歸田。疏三上得旨。馳驛回籍。病痊起用。己巳逆案雖欽定。爰書始諸大臣。涇渭頗般雜。同里要人忌公者。鉤摘前疏相傾陷。坐削籍。公曰。鼎鑊餘生。失官復異憾。比歸。事通議公益謹。養志承歡。曲盡孝道。歲丙子。通議公捐館。公哀毀如禮。絕過從。推通議公意。就城西構屋數十楹。立文徵社。聚友黨羣從。講肄其中。諸奉公指授躋通顯者。甲戌則劉公理順廷對第一。己卯鄉闈則仲子百驥從孫明輔並得雋。前後社中登甲乙榜者數十人。至今稱之。乙亥春。流賊攻杞。公棄產募敢死士。悉力扞禦。賊眾披靡退。辛巳。賊以杞守固。方用奇。越杞破陳留。并力攻汴。謂汴陷則杞孤。席捲易耳。賊攻汴。汴危。公憑血馳書抵保督楊文岳總鎮左良玉。縷陳賊勢疲。罷為序報以待。督鎮懸書示麾下。誓滅此朝食。公率先傾橐四千金。邑人合捐二萬餘金。我兵鼓行西。賊遁城賴以全。撫臣高名衡按臣任濟合疏以城守功入告。上賜公帑金三十兩。紵絁四表裏。公北面稽首謝。已聞秦督汪喬年滑賊悉銳乘勝趨汴。破陳州大康睢州。距杞數十里。公逆計勢棘。方請援撫軍。賊迺東破歸德。屬城以次陷。先是杞有合汴議。邑令呂翕如偕紳士齎戰守什器入汴。撫軍復檄邑令還守杞。公曰。一杞令豈能扞強賊哉。迺棄家出城抵陳留。聞賊眾踞杞。遂渡河。挈家沿淮僑山。

陽居歲餘。生計落然。召諸子前曰。國步斯頻。何以家為。於邑廢食。寢者彌日。癸未冬。聞督師孫傳庭駐師洛陽。公曰。失計甚。藉賊扼險。饒道絕。兵百萬庸可支耶。及聞賊入關。公仰天泣曰。若處國何。夏五月。公始聞賊陷京師。天子殉宗社。復仰天泣不已。會留都擁立福藩。羣小朋邪。善類殄瘁。公力疾思堅。見新君。舟泊高郵。兵亂不果前。聞臣將德璟。公門下士。從北來。見公舟次。公亟訊東宮二王及甯錦兵燹賊狀。德璟嗚嚔不能對。公復仰天泣垂絕。德璟辭去。公疾革。趣諸子泣告之曰。吾自此畢命矣。始以同官蒙誣。今以後死。齋志負負無可言。不自負者心耳。新君南御。若曹勉遵父訓。毋上疏申理。毋請恤謚。言訖復泣。遂卒。年六十四。卒之日。貧無以歛。諸子環泣失聲。如不知皆傷之。原任大學士李標。太僕寺卿王濛。光祿寺卿張宏道等。來會哭。哭盡哀。見者流涕。時甲申五月二十一日也。公立朝大節不渝。又如此。至於飭身厲行。里閭樂推許。見家乘。不具述。子五人。長同驥。以蔭授都察院照磨。未就卒。次同驥。己卯舉人。次同驥。戊子舉人。次同驥。同驥皆諸生。驥早卒。五子負才器。有祖父風。驥偕驥尚節。極重然諾。守父志不仕。公識淵學博。恥銜名。所著演綸彙。金華殿中語。尊足軒詩。紺雪堂集。藏於家。驥別有傳。

外史曰。陶潛恥事二姓。晉書附隱逸。宋文苑傳列蘇洵。行業失實。歐陽修為洵誌。削

辨奸不載。余嘗改陶蘇傳補史闕。嗟乎。史可盡信哉。余觀孟公蒞官本末。未嘗不傷其志。悲其遇也。公通籍歷事四朝。以鯁亮稱。國變憂憤卒。可謂較然不欺矣。當嘉廟時。忤璫展相位。禍且及不死。幸耳。獨不幸處跋扈之地。同官陰蟻公於前。讒口顯蜚公於後。公始終不自明。惜哉。雖然。呂許公坐枉張紳職罷相。不求雪。既雪復相。不謝文潞公。不自暴無書。關尼普惠為同列分諉。識者韙之。若公者。視昔賢何如哉。語曰。心罪者天刑。春秋誅意亦然。公之心。公自信之。天信之。他媚璫陷公者。不再傳。子姓凋墜。重為世僇。公苗裔茲茲。名碩踵相望。世即不公。信何傷。所憾者。迹公之過類文呂。原公之志類陶蘇。然公於相位。以羅謗幾得復失。失相謗卒不得白。公於姦非不辨。於國非不忠。以壬戌未擊璫。甲申未殉國。眾疑公愛一死。卒不得易名。誠可悲也。已。余懼世罕信史。因謗揜直。因後死蔽忠。背古勸懲大義。故撫軼事為公傳。亦猶鄉者改傳補闕之意。惡在必易名而後論定哉。

明全守一傳

守一姓鹿名鳴時。自更姓全。沛縣人。警敏好奇策。遇事敢往。以材武雄里中。四方任俠樂與遊。世罕能測也。萬歷甲寅年十三。失怙恃。念先人累通義必償。集宗黨棄產償如券。去晨依博徒。取少錢自給。暮獨宿業祠。流離瑣尾如是者三年。尋雜肆陰陽。

卜醫算數方技輒能工。雖工不售。家益落。辛酉從業農。憊甚。仰天曰。士各用所長。卒穡事。老牖下。非計。聞逆寇。張勝邑殆。迺出應募。充守備。虞部陸化熙接禮加等。自傷遇未稱志。舍學。鮮建立。辭虞部。笈書入嶧山。學屬文。然性厭俗儒。佔畢。獨喜觀歷代史。見古得失成敗。擇善盡可。時施者心識之。竊奮曰。宗元幹。燕逢辰。直須時耳。百夫長。豈足伍哉。後先擔簦走姑蘇。過虞城。夏邑。碭山。陰求天下忠敢士。用羞於朝。方相次部署。忽國社屋。日拊膺號慟。慟垂絕。既而曰。誰生厲階。效尚可圖也。乙酉。閩部史可法採輿論。思羅致幕府。書幣至。守一以中外孔棘。非武侯汾陽。蔑濟。却不赴。須臾。諸豪傲服。聞行。造其廬。肅陳詔冊。趣嚴裝上道。守一戒勿泄。遂行。戊寅。子身聞關數萬里。專閫建旆。坐和門。草檄令露布。俄頃立就。文殺義顯。讀者為動容。不數日。糾合義旅。鳩宣朝章。連官縱乘。同憂若一。屬是時。景從嚮應。獻功在指顧間。會天不憐事敗。守一復裹創登陣。飲血陷陣。力疾與強敵抗。取咸壯之。有頃。謀馳白城。頻危。守一環曹震怒。退自度力竭。城必潰。命閫門自焚死。焚至半。獨蹶興曰。妻孥可死。吾未可死也。亟履棄鉞。輾轡重夜。出亡。或疑謀賊具違亡安之。守一曰。辛鉞以是而行。謂之斷。非而行。謂之亂。始終行吾是。稔亂從非。我弗為也。焦膚灼面。出入兵鬪。萬死中得生。還守一窮困時。如苦集賢。不的受人惠。及柄用。傾橐周友。危不責報。客汴城。垢

衣糲食未嘗見溫容。居恆與人期。冒冰霜。觸豺虎。必往往如期。克抑必代雪。患難必出救。非類必引避。人以是益多之。生平視死如歸。數十年猶一日者。性也。非學使然也。事詳守一自著壁記中。他秩官數歷。歲月征邁。事絕軌迹。行無端崖者。闕不書。論曰。善力田者。主伯亞旅。一乃心。強以日。膠力原隰。間然後盈甯。有成功。今辱主垂拱於上。亞旅荒飽不已。競起而寇攘之。雖百強以馬望銓艾哉。此守一所由進退維谷。長太息也。雖以兵家審合變。因迂為直。移患為利。守一顧能諱以成其正。合以制其分。亡以圖其存。功雖未懋。勤勩備矣。况王績可俟哉。余感事準史法。為之傳。異時南史宜知者。信云。

徐潛夫詩序

讀其詩未遇其人。則愍然以思。遇其人。盡讀其詩。則肅然以悲。余今日於徐子潛夫是也。鄉者過漢上。由及門李房季讀徐子詩。異之。踰六年。邂逅栗里旅舍。徐子盡出其近詩示余。語次撫今緬昔。執手流涕。余始知徐子先是轉側艱險中。虎落羅閨。屢瀕困殆。往往會天幸得脫。人以是奇之。比歸。氣不少挫。雖當蠱暉翹陸蠹。驚蔽空之時。眾方匿景退。而徐子顧獨抗懷砥行。恥為身謀。酒酣眦裂。歌罷鬚怒。舉生平悲憤。不能平者。寓之於詩。余聞諸友人。亟稱之。友人曰。昔杜本輯南渡後遺民三十人詩。

為谷音。讀者輒泣下。詩故傳。徐子詩亦然。余曰否。柯芝孟。屢要人輩不具論。他若丁開之哀建業。汪涯之詠江帆。師嚴之賦渡江。三子者皆生長楚國。才節介義。不忘靖獻。徒齋恨終耳。今徐子息駕朗川。迹類高蹈。所靖獻不止。此友人起問故。余弗答去。因私徐子曰。旨哉子與氏論。大任必先動忍。徐子動忍曰深。藉一旦得信其志。余何悲之有。是時徐子感余言。歛容內顧。仰天歎歎。若將排憤用所未足者。嗟乎。然則今世稱徐子詩非乏。敢以詩盡徐子。不敢謂詩與谷音並傳。誠見其詩非不傳。傳者不獨詩也。余終冀徐子之有以慰余思。釋余悲也。雖然。余髮矣。即不與柯孟諸人伍。慮未獲出與徐子頡頏。徐子異時思余言。

俞節孝傳

俞塞字吾體號無害。婺源人。少孤。母弟相繼歿。客遊不能歸。自誌其阡。哀其窮。曰。獨曰孤。性孝友。里居寡喜。可好讀書。遇有得。顧影獨笑。坐達旦忘寐。膚肌柴立。嘗語人曰。使我為伊周難。為孔顏易。或疑且怪。塞曰。士不得志。必不能為伊周。我欲為孔顏。孔顏即吾心。孰能樂之。又曰。士不知命。日趨利避害。惑也。塞往年將之邑。計里索少錢。具饗食。甫出門。遇道上餓夫。輒捐橐予之。已念我餓若何。未幾渴就泉飲。掬水見遺金一鉢。擬視之。適如鄉子餓夫數。塞以是得不餓。比歸。念古不拾遺金。復出反贈。

塞者如數置泉側聞者嗤塞迂。塞自信益堅終歲旅食不苟受一錢惠衣敝履穿處之晏如。顧喜飲酒酒酣抵掌談古今成敗歎歎流涕與人交恥阿附非類雖厚遇塞塞引避他同志者既合終身如一日死生患難不稍易。遇友人過失往往面折不納則請絕塞平居見理明持論峻恥隨俗軒輊方避亂信州邂逅楚張別山同敬與塞語奇之同敬故江陵相國裔孫也一日問塞先相國本末具在若史氏深文何塞曰世詆相國姦過也塞以為權相耳然權之去姦間不容髮惜當日不免為賢相貽世口實耳。同敬默不應未嘗不心歸塞言同敬赴閩召招塞往塞以母老辭居白下。甚會巨猾伺間屬所親操書幣請塞為子弟授經歲致脯資百金塞目攝所親曰若豈能以金餌俞子哉卻不報適妄人蜚書蜚塞有友人謂塞曰是非至今日般亂久奈何以口舌爭脂韋弭謗可也塞裂眦曰子誤矣是非不明故爭爭而後是非始明不然春秋是非二百四十二年皆亂世非治世也塞不意子獲罪仲尼之深也友人慙沮退其居心積行類如此等博方聖羽稱之曰俞子孤情高寄見地直捷當在陸象山之右其安貧守道獨立不懼目中未見有兩最難者斬斷名根本體中無絲毫夾雜尤不可及也。知言哉塞少工戈法小楷草書韻頌鍾王揮毫立就以善病涉覽岐黃家言輯醫易自謂不研易理不能精醫決諸症治奇中儕輩雖侈稱其能非所

好也。塞古大儒自任。恥章句學。天假之年。馴至曾閔無難。不幸年五十死。死之日。為歛葬長干破山之南。勒其碑曰。故處士俞塞吾體之墓。塞後先遭歷困阨。畧見本集自述。塞母汪貞淑與古匹。撫訓二孤。辛勤萬狀。不食絲髮報。痛哉。塞貧未娶。弟早世。皆無後。富學行如塞。昊天不殞。罕建就。知不知惜之。所著易脞詩起四書心詁續橫浦論語頌理學資深錄樞堂語錄西學辨疑本草正誤醫易及序記書牘雜說若干卷。軼不傳。存者五七言近體而已。揆之古人。元德秀徐積林通之傳也。同學滄墓如塞在。私謚曰節孝先生。

秋潭崔先生墓誌銘

今年夏。余聞秋潭先生疾革。趣及門。獨孤塞就牀前。刺安否。先生擁衾與獨孤生語良久。類出入古儒者。萬論足為世師法。已又深念余旅居困殆。守正不苟。何為雪涕別時。執獨孤生手。歎曰。得正而斃。奚憾。恨不復見芑山先生耳。獨孤生歸。以告余。余泣下。不逾旬。先生果卒。其孤九叙哀訃。至余為位哭。哭已。謂獨孤生曰。善類凋喪。後死者安之痛哉。一日。孤纍然衰經。奉遺命來謁。余請銘。余復泣曰。生平恥諛墓古處。如秋潭先生。忍固辭。不為先生銘。先生姓崔氏。諱象。字季溫。別號秋潭。其先永平府灤州人。始祖武略將軍諱整。由洪永兩朝軍功。世襲錦衣。遷江南。因家焉。八傳至秋

潭先生曾祖諱鑑。隱德未仕。祖諱文。富論著。以明經推祭酒。父諱選。家中落廢舉。娶劉氏。生四子。伯夢祥。仲夢龍。叔夢鳳。先生其季也。先生負才。性篤孝。六歲就外傳。授孝經成誦。容止軼羣兒右。不幸早孤。思光大堂構。往往拊膺。懼罕克成立。晨夕遵母孺人訓。唯謹。業成。丙寅。應童子試。學使者賈公繼春第所試文上等。補邑弟子員。遠近詣門請交者踵相繼。母孺人度貌孤艱。勸能自奮。竊喜色。而先生益孳孳講求經術。其遭時自著見。丁卯。母孺人即世。先生號慟幾絕。族里交惜之。服除。痛二親見背。祿養弗逮。天焚棄制舉業不果。由是專肆力詩古文。詩古文曰工。四方博學能文章者。道金陵。皆願交先生。先是。余友章大力陳大士楊維節諸人。每為余推稱先生。不置口。余交先生。雖後於大力大士維節。然磨切無少間。閱十年。猶一日也。余迺益信鄉者大力諸人言非誣。先生困諸生。非力不食。嘗折節為門弟子授經。取脯脩自給。諸承先生口授指畫。為古今文。皆中繩度。後先發名著績者頗眾。然先生儉靜自刻。厲恥干以私。義苟不合。雖隱默。不屑降色相諧附。以故出入無留資。遇空乏。自視裕如也。甲申以來。先生日徜徉山川。賦詩見志。世鮮知者。猶憶先生嘗過余。見輒追感。疇曩相視涕泣。兩家童僕咸莫識所自。錯愕左右顧。客有適自外至者。瞪余兩人。嗒側如有失。亟趨出。卒亦不審余兩人何心也。嗟乎。今而後余能復見先生哉。可悲也。

已先生生萬歷乙巳年十一月三十日。卒今戊戌年五月十二日。享年五十有四。以某年月日葬金陵安德鄉趙村之原。元配文學張公敬津女。先生四年卒。懿行具張氏哀辭中。生二子。長九叙。學行如其父。邑庠生。次九德。六歲殤。一女。適前國子生宋公。以傳子名。璦。孫男三。長曰椿。岐嶷能讀祖父書。次楓。次橙。尚幼。孫女一。未聘。余觀先生自為譜事足傳載者不勝述。述其大且著者。先生口吃。樸重寡詆笑。與人交。絕去崖角。迨上下古今。持論蘄蘄。無脂韋阿世意。居恆雖寒暑疾恙。未嘗頃刻去書。蓋其天性然也。方易書時。屬孤九叙曰。兒謹身節用。不辱先足矣。家禮治喪。載凍水溫公說。大指尚簡易。唐廬州刺史李舟與妹書。深為後世親死禱。浮屠者戒。與易甯戚聖訓具著。兒一切遵古禮。毋繁文滋費。父庶幾瞑目。慎旃。此言皆獨孤生所親見聞者。先生言行合道多此類。昔昌黎稱李翱有道而甚文。余於先生亦云。所著潭上文稿四卷。詩先後二集。行於世。銘曰。

卜何親古是蹟。困其獨道不傳。

隱公論

劉城

三傳曰。隱攝也。桓貴而幼。隱長而賤。姑立焉。將有所與也。歐陽子曰。非也。生則稱公。死則書薨。國人戴之一。魯君爾。何所明其攝也。余曰。二者之說。皆未盡也。攝之說。自古有之。而隱不必然。即隱之攝。亦隱欲然自處之情有之。而義不必爾也。周公於孺子有居攝之號。君薨而世子生。有卿大夫從攝主之文。然皆有所不得已者。隱為繼室。聲子之子。則嫡子矣。仲子雖貴。不稱繼室。亦妾子爾。即諸侯不再娶。隱與桓皆羣妾子。而隱又長矣。君魯者。舍隱其誰。飾妖妄之手文。借貴援於外氏。於理道何居。而反指長君為代。置乎。故曰。攝之義。自古有之。隱不必然者也。然說有自起。事有從來。惠之嬖仲。欲以立桓。審矣。手文貴族之論。既播之人。家庭朝列之間。屢見其意。隱賢者也。欲承先公之志。致之桓。以鳴高。審矣。是故攝之義。常以自予。亦以語人。則當立之義。反不見。而攝之形已成。昔宋穆公曰。先君之不爾。逐可知矣。吾立乎此。攝也。夫穆公非攝也。而自云以攝。欲致國乎與夷也。隱亦曰。為少故也。吾將授之矣。使營菟裘。吾將老焉。此與穆公之辭同。皆實非攝。而自云攝。所以為讓焉爾。孰知國者利器。不容假人。可辭讓於未我立之先。不可疑似於既成君之後。人方欲就我。或避之人。方急操我。或縱之。授奸人以口實。而藉之柄。隱自處有未盡焉。豈謂分實應攝乎哉。

國朝文匯

卷十六

十一

國學扶輪社印

故曰隱之攝亦隱欲然自處之情有之而義不必爾也。迨其後君魯者桓。後之有魯者皆桓子孫也。借隱為讓之辭。遂蒙隱以攝之實。以解桓之惡已爾。承謫習舛。殆非一日。三傳之語。必有所師。非臆說也。而第不深察其實。隱有即真之理。不當被攝之名。是以隱自處乎攝。而處隱者以為君。內外無不順之辭。而春秋之書皆予以正乎君之法。非好學深思不能心知其意。故曰二者之說皆未盡也。

四皓論

四皓策士也。而或擬為神仙。故或疑為偽飾。皆過也。夫其山居而老。得至者壽者策也。其不能已於一出。以稍見其功名。亦策也。何也。秦為無道。以烹滅諸侯。焚燒先籍。寇使其民。如湯火之燎體。此其大亂可計日。至已自度之。非與王之身。又不肯為烹狗。藏弓佐命之烈。則奈何。以其軀橫四通之衢。而供劉項之鋒鏑。是故逃去人間。山居谷汲。結此同心。倘佯芝朮。蓋自放為臃腫支離之樗櫟。故斧斤不尋。而天年得老。此不過自處之審。而非有吐納神怪之事。故曰策也。夫漢興十年矣。商山不在絕。傲四人之踪。已達於高帝留侯之耳。而謂高帝留侯之生平。與漢廷之政治得失。不詳孰於四人之間。見哉。故夫聞嫚罵之習。抗手自高。當卑躬折節之禮。則翩然來報。殆亦人情。非盡飾說。何者。四人蘊奇抱略人也。亦不肯槁項黃馘。絕不一見知於世。所

以聊玩人間。欲偶為一非常可喜之事。以不至泯滅。而況太子之聘。可以不來。留侯之招。不可不赴。彼豈不知滄海力士。圯上老人。皆從良遊。而奚有吾四人哉。要所以見其為策士者。在聞太子將兵之命。而急謀以止之。夫太子將兵。是晉獻申生之已事也。然漢廷諸臣。未聞有起而爭者。獨四老人已汲汲相謂。告建成以禍患甚詳。而教建成語呂后。以乘間之言。甚具。使徒深山野老。下至闕廷。其能與人幾事如此乎。昔者侯嬴一抱闔。而知王之兵符在卧內。惟如姬能竊。又知公子之為姬報仇。而姬願為死也。事卒以濟。深山老人而救王后。以泣止。又教建成以閒語后。何以異是。吾是以決四公為策士之雄。而笑往者狐突之拙也。至於偉衣冠以相。稱太子仁孝慈敬。延頸願死以相劫。何一非儀秦范滂之故智哉。若夫太子既定。翻然遠引。不知所終。世益疑為神龍威鳳。而不知策士蓋有之。魯仲連為人排難解紛。而終無所取。欲以輕世肆志是也。夫仲連固戰國策士也。嗟乎。侯嬴田光皆藏身戰爭之時。以至於老。徒以貴而下士者。誼當為報。遂一為公子死。一為太子死。而不辭。綺黃諸人。亦老為漢太子出事。成而乃得為魯連先生。此其成敗利鈍不同。而為策士一也。何疑哉。

池州防守議上

今天所防守者土地也。而防之守之者人也。人和聖賢正論也。池無險而難堅。有瑕

而易動。是故固人心尤急也。曷言之。池壤平遠。三面受輪蹄。東南盡青陽石埭。境錯宣歙。西盡東流。接九江。騎而馳。倘佯而入我國都矣。徒行坦步。連袂扣國門矣。古云。奧府四塞。一夫當關。池何有也。獨直北濱江。湯湯天塹。差足自限。而十五里而近。升為皖桐。兩岸夾治。春水雖生。可辨牛馬。望航亂流而濟。日夕相繼。使載奸宄千億輩。自北而南。誰曰公無渡也。一城斗大。浮置江干。直黑子耳。脫更有劇盜乘艤。艤至則帆檣傳雄堞。立靡碎矣。此所謂無險而難堅也。而又隍濠不治。碑薄者崩。陲軍實不蒐。單弱者烏有。沿江戍所。甃石皆散亡。無論踐更者。城自東迄北。謀角無聲。按部使者至。行臺頗近。即聊一鐘鎔。過則已焉。故四五年。因再反獄。逸大盜劫公解案。新關出入。無門焉者。形見勢屈。亦斷可知也。其甚者。易牧日乖。窮蹙已極。教化亡具。偷薄競起。山居而谷汲者。坐不得食。則習椎埋剝削之奸。為胥吏所虐。實無復之者。亦遂欲為南塘之出。此其地其人。即青陽石埭為劇。固與宣歙錯接。習其風尚。勾連窟穴。為吾內蠹者也。瑕而易動。莫斯為甚。夫以有瑕易動之時。而處無險難堅之勢。何恃而不恐。萬一有幸。曰賊不至耳。賊不至耳。夫事久則智生。兵挂而變起。無論吾所云亂流而濟。帆檣傳堞也。賊從中出。且奈何哉。然則無策乎。曰吾無險。則不得所持之資。而務亟為自勝之具。吾有瑕。則反觀利弊。而得措置以為轉敗之功。非人心烏

所藉之池雖褊小。遠不暇論。萬歷而後。載藉可考者。大畧戶一萬九千七百有奇。口七萬八千六百有奇。即以附郡一邑計之。戶六千七百有奇。口三萬二千八百有奇也。姑以一邑戶約畧之。戶得三人為守。守者二萬有奇矣。戶得五人為守。守者五萬有奇矣。夫今日之賊。固非南倭北狄。殊形詭性。異技絕倫。中國所死不敢關者也。猶是飢民。猶是逃卒。猶是脅驅烏合之徒。彼能為跳蕩。我亦能禽戮者也。且夫今日之防賊。又非出玉門。浮瀚海。赴徵調。遠期會。急公家之難。博趙義之聲也。賊每焚村落。或舍官城。概殺平民。略無存恤。吾底力而防守。吾身命也。云爾。吾鈞聯繩貫。合力防守。各防守身命也。云爾。無險可扼。而不自為堅距計。豈其聚族為金魚乎。無險可安。而遂無可如何聽之。冀賊至則鳥獸散。豈其室廬墳墓親戚骨肉之不一黑胸乎。且羣盜如毛。走則何處不相逢也。雖是言之人。自為守者。宜其踴躍奮迅。觸白刃。冒流矢。計不旋踵也。而有不然者。德教不先。法令不豫。飢寒苦而怨怒積。良民無聊。奸人有以生其心也。故務和人者。使之衣食饒足。衣食饒足。則有生之樂。而愛其死。使之情氣和平。情氣和平。則無憤恨之志。而不輕去其鄉。使之明禮義。重廉恥。禮義廉恥。明則偷生苟免之計絕。而果敢勇毅之氣生。夫池土固瘠土。瘠則貧。貧則易見德。池俗固愚。愚則近厚。厚則易向方。使池一邑中六千七百有奇戶。三萬二千八百有奇。

口。其所以謀為防者皆詳以確。而力為守者皆勇以強。何畏乎飄忽之賊。又何藉乎
恒怯無賴之兵哉。昔者周澤敦龐。人心蟠固。故雖以洛邑之地。夷曠四衝。廢為至弱。
而可以久。秦刻深強。服人無固志。則以咸陽天府。形勝獨制。而瓦解土崩。策池者以
小從大。以古稽今。亦若是已矣。豈其老生常談哉。不根本是圖。而娓娓枝節。兵饌水
陸之謀。因瑣毫毛。攻穴險隙。則寃說也夫。

池州防守議中

夫守池者人矣。則黎民其首治與。曰吾亟治之人。三。而民不與焉。三者之人治。則民
固已大治。然後可得而用也。一曰郡邑長吏。一曰鄉之薦紳。一曰庶人在官者。蓋池
人薄植而寡蓄。志樸而氣孱。非若吳楚他郡有末利之贏。足多腹削。負強悍之姿。不
受虐使也。上之人稍煦煦之。陰陽之。即杜母召父之戴翁然矣。今最屬塞路。表去思
而祝畏壘。何累累也。其或奮其吏氣。虐以非辜。誅求草菅。罔遺餘力。亦頭搶地。謹乞
憐而已。默然飲泣。惟所為。而不敢對一語。雖然。痛甚者沁心。恨隱者刺骨。幸今無事
爾。一旦賊至。立而視。掉臂而去。無乃亦其情與。責以手足之捍頭目。得乎哉。夫居上
有行仁之勢。為長挾布利之權。其徭役均與。聽斷審與。催科時與。贖錢輕與。贏羨省
與。勤乃職。敦乃事。盡乃法。與是郡邑長吏之人治也。夫然固所以大治民也。池之產

顯要不多。先達諸大夫。類潔清簡飭恭謹。自將兩。非有宜興溧陽桐城之氣勢。積虐閭閻也。稍近一二汰矣。有暴起得志。欲遂為倚卓者。或與上之人因緣交結。得進說左右者。則遣蒼頭詞里黨。籠致富民。輒伺喝之。又反抑疾苦。開導利端。貢媚乃公。圖便己欲。若是者。未有非黷財賄壞禮法痛楚人心者也。怨汝詈汝。實啟瑕釁。可奈何。且夫利則相害。征徭或詔力役非平。使赤手枵腹。伺隙思起之仇讐。而為荷戈擊柝。衛吾封樁郿塢也。有是理哉。夫鄉先生死而可祀於社。猶以是非義理言也。今禍患亟矣。誠明而熟於計。訟獄無涉。與選舉無奸。與素封無覬覦。與家奴狎客無橫生事端。與民有利為請於上。與之民有害為請於上。罷之與輸納則身先。守禦則身奮。效忠執義。作為倡率。與是鄉薦紳之人治也。夫然又所以大治民也。雖然。未若庶人在官者實甚。池有天幸。吏吾土者。未有非賢人君子也。若不便而媒孽之。惑易之。曰廉吏不可為。某事某所用。將安出。某所某事。費且莫支。曰貪吏而可為。某孔某利。應屬之公。某利某孔。取之無禁。既以移上心中所欲。而乃張牙露吻。徧吸脂膏矣。其在他方鄉薦紳起而能言之。若不得獨為政也。池則吾所云顯要不多產耳。潔清恭謹。握手勿向過。孰出一語是正之。他一二汰者。或反執恭敬。仰鼻息。交高其能於君大夫。冀因君大夫之暱。若為我道地。以小有濡沫也。嗟乎。下視他輩。又何足云。吾嘗約略

記之。郡大夫之長其以書史役者殆百人。以奴隸役以便嬖役者殆六七十人。他雜役無氣勢者不與焉。邑之長人減其十之二。郡丞別駕及李人減其十之五。他小官無氣勢者不與焉。是池一歲而有不去之蠹賊千也。是千賊者其以作奸犯科枉嚇民財靡有算數者置勿論。第以常法度之。彼皆輸直於前人。乃入役直豐殺有等。姑約略之人率白金二伯。是已先置母二十萬也。即以三分息與之。彼亦將歲取子金四萬於我百姓也。蓋池之民歲輸四萬金於千賊。幾何年矣。怨深而髓竭亦已甚矣。一旦又有所謂秦隴楚豫之賊至。而此千賊者方徜徉堂皇。追呼鞭朴曰。爾民其衛我。我役官家。不編行伍。爾民持金錢予我。我免爾衛爾。不持金錢予我。我困爾以法。雖勤衛我。使爾受罰責。然則池民者將捐忿釋怒。肝腦塗地。以死關去來倏忽之賊。而謹衛負隅根蒂之賊乎哉。斯亦大惑之甚者也。請汰其黨與。省其冗與。平其直以補士伍。與簡不法者沒其貲以享士與。不授以意。曷鵠張與。不假以柄。曷櫻攘與。不偏為右。曷恣狂與。夫退而緣南畝者多。則風俗淳而志慮壹。攫財積恨者少。則物力足而情誼專。故夫大治庶人在官者。又全乎其治民也。蓋以防守切言之。吏茲上者。城池存亡之律。危乎切膚矣。儒紳之家。其顧惜係累。百倍於單弱窮窶也。池之胥吏。又皆鮮衣美食。廣田宅。儲珍玩。前堂羅賓朋。後房列妓女。苟不得倉卒從賊。則守之亟亦

百倍單弱窮窶也。是三人者。庸可緩諸。且以事理推言之。本末相使。道法相維。其大較也。賢君侯一人耳。所與共扞擻者。茲林林矣。推心置腹。乳哺安全。潔源正表。徒自為與。亦將以生具共也。夫虛室生白。德威惟畏。吾未見賢君侯之政教號令。徵發期會。不如翰如飛也。夫鄉之大夫。亦所部民耳。民儕類之有氣力者。爾。庶人在官。庶人也。民儕類之害馬云爾。今也民之有氣力者。與其單弱窮窶者。心意和同。歡欣無間。晝則相見。夜則聞聲。翕然一人出而圖事。斯大善矣。害馬斥去之。不游庠序。即南畝矣。尚耕作。習勤勞。則其力可使。羞貪狡。樂端慝。則其心可安。是去蠱賊千而益勝兵千。再戰勝也。益勝兵千。而使向之憤恨幾幸叛亡者。率踴躍專固。荷鋤耒耨。賊是更益勝兵不知幾千萬也。益大善矣。聖賢之業。恃乎人心。經遠之規。始自貴近。是故治防守者治人。治人者治其人之要。聽者不以吾說為迂。吾乃敢進而畢其議。

池州防守議下

今議者亦大集矣。吾皆用其說。稍損益之。而第行於吾所建議之後。上下公私。一心如結。疏通牢固。根本沃深。則其事迺精而行迺效。故有二經焉。曰防江。曰守城。有四緯焉。曰治兵。曰治餉。曰治民。以出餉。曰治民。以益兵。經之中條析之目。各四。緯之中條析之目。兵有六。餉有三。而治民之目。無專指。總二說耳矣。請具言之。夫賊所在有

之不必江以北也。江以北者固然矣。防江誠是也。所謂禦之藩籬之外也。江干舊有片堠約十里一臺堠矣。置守望矣。吾視傾圯者繕葺之。亡匿者勾稽之。一尉幕住按視之足矣。江濱舊有哨艦約三十里三艘艦矣。三十人衣短後矣。吾視罅漏者補之。游閒者約束之。一百夫長往董課足矣。此二目者。按舉舊典。非擾民間。然故事沿之。亦未即有利者也。若北來之勝必稽。夜泊之帆宜問。似矣。伺察非常。懼吳子輩白衣搖櫓也。而池土寡產稻粱。百物待命。客舟窮詰苛嚴。商賈裹足。則池乃坐困。又若澤居之民。可益游徼。近水之村。就任團練。似矣。人自為守。如范龍圖弓箭社可也。而使等隸尺籍。務欲中程。器甲貲費。迎送失業。舊所征徭。百未省一。則民益重困。此二目者。事創今茲。人生惶惑。行之不善。未免有害者也。第言防江法如是止矣。精修之。使果得效。則有繇然爾。且吾治所及池屬地也。使賊上從九江濟。下從姑孰湖陰來。池烏能為。故必有賊。即渡江。吾孤城屹立。處萬全無事之勢。而後可議防江也。賊所在有之。不必城以外也。城以外者劇矣。守城誠是也。上所自為者。嚴保甲。謹讀法。斯走集之奸絕。窟穴之靈清矣。然或土著之子。鷹眼蛙生。或兵起之後。鳴音乍作。可奈何。廣漢翁歸有鈞距籍記之。能雖效者莫及。以詳以勤。當亦具得要領也。上所使下之人為之者。儲新米。歛牲畜。斯圍城有支久之粟。堅壁無喬寇之糧矣。然數家厚積。羣小

生心。無賴藉以尋端。公家因之啟釁。庸無慮諸常平公廩。比屋贏餘。使官私具足。富貧相耀。以和其心。蓋漸積使然也。是二目者。行之兼道與術矣。瑾城門有兩便馬。輒甃石疊。力鉅而艱。蒼黃不可為也。往來無他塗。辨詰差易。奸不得闖入也。然而薪水迂勞。貿易乖迂。貧人廢業。坐敝為憂。又物情沮抑。病起鬱蒸。啟閉有節。可勿講與守。城堞有兩難焉。睥睨多於戶口。闕一夫則瑕。患人不足也。坐派聽之伍伯。受小賂則免患。法不均也。況乎責辦夫石。督治衝墉。勞力傷財。猶或扶其臂。又賊耗不時至。便驅迫上城。烽火屢戲。朝氣銷亡。力食者不暇給。可勿思與。是二目者。行之辨久與暫矣。第言城守法如是止也。我觀今日之賊。城三日守。即舍去矣。顧誰支三日哉。秦隴楚豫舒六之間。陷名城者以十數。彼豈不講畫守具如所云乎。故曰精修之使果得效。則必有繇然爾。此所謂江防城守之說也。池兵六百爾。落落星稀。殆不能軍矣。然使一可當百。異多少足云。請語治兵者。是有四先。曰先之以廉。卒故翼人子。非生有敵愾之心也。釋耒耜而韎韐。冀得餉資給俯仰耳。今常例有餽矣。支領有扣矣。替代有人矣。贖罰有規矣。卒知其指所在。捐以啖之。逸而事他作。器與手終年不習。即威與法不得施矣。惟無所於染指。則率以蹈水火可也。曰先之以勇。愛身命者人之情。作之亦必有道矣。池所署伍長。非有大帥建節。不可等夷之勢也。乃者使捕鼠盜。

匿不敢前處已如幃婦人而驢素所進金錢法不得施之卒往以死關知必不能登
孤陷陣古專聞或為之而況若等與曰先之以勤今日者非有臨陣決戰經時不解
甲介胃生蟻蝨之勞也稍習練之以待耳弓弛而不御馬食粟苦肥相踣厩中不試
而徒以責帳下兒坐作擊刺不少休息即故事耳何第苦吾屬為也古者甘苦同士
卒且經習勞瘁異日蒙犯霜雪橫草稱功不亦可乎曰先之以法蓋既潔清自愛身
先勞苦斯亦可以有辭於下矣司馬法在如之何解從繩墨也昨者城守戒嚴卒監
門矣今勿聽人移家出而惟賄是問也賄不至則懿筐不得就柔柔賄至則肩輿累
累且為耳目導去也昨者江上耗惡卒巡徼矣今遏止北來者而惟賄是求也賄入
則叩涉親於我反賄不入則賈客布帆執言為寇虐之使無聊賴也是尚有法與而
號為其長者孰視之若無覩或反右之陰利其為是可用之征伐行陣間乎而治池
兵者其最先有二曰先擇舉望之人池任兵事者世職白衣咸戲下矣非不云取資
勳舊拔異屠沽也而皆材職朽穢齷齪猥污第持要人竿牘至或暮夜有所乞憐即
一旦指麾在上矣人微望輕物情不服導之壞法侮紀而即推擇巖穴乎曲逆窮巷
門來長者之車淮陰寄食募營萬家之勢皆早有著見非鹿鹿也曰先定畫一之官
池兵六百耳水陸分隸殆十餘長轄之十羊九牧弊誰不知則以所持竿牘與暮夜

請無以塞責。聊概存之。分沾濡也。卒多所剝。而軍法如絲棼矣。苟推擇之得其人。即全旅付之。金鼓號令。事無兩制。耳目專而心志壹。不大善與省費去貪。又其次矣。以是策池兵。池兵其殆可治也。且遂言餉。貴池池首邑也。方今丁一萬二千七百有奇。有例免者。實應差丁一萬九百有奇耳。田二十萬四千有奇。有例免者。實應差田一十八萬七千有奇耳。千方百孔。取足其間。無事不徵。無徵不派。無徵派不重。羨嚴科。不獨三韓治兵。薊門增壘。稍出常賦外也。故池之餉。萬不得更議增。無已。治其蠹餉者。斯餉足矣。曰。取之之蠹。食土之毛。既厚自予。而以供軍國需。其孰忍捕之。惟民部之會計。牒下邑胥。胥謀之官。匿不使外人見。偽增故令。別立科條。正供無多。而旁取已侈。侈則不能疾輸。輸不中程。曰。此逋上供也。又加罰焉。追呼有賄。贖銀有入。旁費益增。而常賦益坐敷矣。反是則輸將早及格矣。曰。入之之蠹。賦之入也。所待命者多矣。池之民之入賦也。奉上法而畏罰。不及格者罕矣。乃納之管庫。如投大壑。胥謂己物耳。以置母錢。以買田宅。為富人居。又狎邪用之。如泥沙然。羣役卒扣之。邛移稍應更叩之。蔑以應。巧謝之。巧謝之不支。事大露。姑以身入獄為質。即泰然矣。僉曰。餉廩不贍。夫豈不贍也。反是則支給裕如矣。曰。出之之蠹。完庫之士。豈惟不出。出亦實甚。役卒來請。必以賄俱。賄不先。即以今歲支。昨歲勿有也。昨歲之前。益勿有也。賄先。且

計月日數如子錢與之。即以今歲支明歲有也。支明歲之俸益有也。勿有者說為餉不我足。其有者稍踰時算之。數歲之勤獲乃止此。益大恨謂餉不我足。而豈其不足也。反是則士飽橐中矣。以是策池餉。池餉非真不可治也。若耽耽者欲民再益餉。吾既謂必不得增矣。又欲益兵。民豈得復為兵哉。請無忌諱言之。夫銖銖而積之。至石必差。言自有贏餘也。今也不然。征供未輸。先懸美格。猾胥里正。嚙十之三。公十七兩。夫民不望施以與我矣。官胥勿入以當加賦。亦可飽數百卒也。不然。即文以美名。曰人樂捐助。而抑勒苛急。弊甚橫征。度量不生。奸人措手。宜急罷之矣。抑池有民兵。殆將百人。號稱壯快。故籍戎伍也。隸事公家。久而不歸。祇行勾攝。每奉符一出。鷄犬為空。吾所謂蠹賊于者具一也。彼六百人者。嗷嗷不平之鳴久矣。還其本事。隸而習之。物情既厭。亦以壯軍容也。不然。剝取農民。日練鄉勇。而抽及於貧。廢棄耕桑。石壕新安之詠再賡。宜亟止之矣。且自昨歲迄今。別有募置。盡惡少年。親若牙兵。氣同驕子。飛而食人道路以目矣。不戢自焚矣。端在若輩益招致之。解散何時也。凡吾所議兵餉者。皆不治兵餉於民。不治兵餉於民。所以大治兵餉也。豈惟不治民兵餉而已。議治民者皆略略於治民。所以大治民也。蓋固已言之矣。固人心。植根本。所藉慈惠之長明察之師。非伊朝夕矣。前所云云有行之。而玉卮無當。象人土鼓而已。吾是以務

推原其所繇而不遽言之。不遽言之者。固將精治其事。豈濶說乎哉。

鄭公奏議焚餘草序

太子少保鄭公。既歿。歷南北。秩任孤卿。為光祿勳。則裁冗剔蠹。當御史大夫。則振興推賢。兩筦民部。則裕廩寬賦。一任司寇。則守法持平。前後統均。則求舊樹人。惟底力是務。如此者。奏議凡百餘上。而於其中。斥擊中人。規切政府。不軌隨言路者。凡數十章。而於其中。難進易退。守正知幾。時時請罷乞骸者。章又數十。城嘗得遍觀。而審讀之。今所畧存。纔十三耳。城反復數過。作而言曰。甚哉治亂之相尋。君子小人之勝負。為之也。然治日嘗少。而亂日嘗多也。則以君子嘗不盡其才。而小人嘗足以傲幸。信然哉。當天啟初元。祖烈具存。沖人縉服。使左右得人。循而守之。無失也。乃卽甫聖燒煬於中。廣戒頴並輩羣附於外。公時籌兵餉。議儲漕。推耆碩。豈不事有裨益與。而妖冶之規。逆耳惡瑤之擊刺。心則公不安其位以去。於是搢紳之既成。而天下之人心失。世不能長治。不亂幾決於此矣。至思皇興代。蕩穢極兇。求治之勤。宵衣側席。周漢兩宣之業。疑在指日。乃者孫宏刻深。林甫伎忍。又下中伴食。參錯其間。公三計羣吏。數議勦防。至累牘。汲汲於吏治民生。而老成遺佚之登用。豈不汙可小康。然而當關作梗。巧中多能。致公再起。再躡賴聖明之知。醫藥春問。乘傳馳還。終以禮退。而國家

之亂不復治則事遂以成矣。夫天啟中與公同朝者高邑趙錫山高吉水之鄒闢中之馮始皆要地也。既不能致公大用而且先公以受禍崇禎中與公同時者山陰之劉吉水之李漳浦黃宜春袁皆公所亟疏請用者也。公不能致諸公竟其用而已亦且謝政歸。公一身有所不勝。衆君子亦不能與爭勝。則治日之數又豈能與亂日爭多哉。然公之勤勤懇懇所謂自牖之納揚廷之論則大畧見矣。後之論世知人者審讀乎此。凡公能長治乎世而世顧不盡其用。舉可觀矣。記壬午之秋公應太宰召。城嘗侍公舟行。日惟講求人才。如首賢夾袋故事亦知揆地多歧。戒塗即具乞罷草。顧又浩歎以僅得一濟時艱奉身而退為幸。而行篋所攜則惟敬輿奏議一帙紙散墨渝猶丹黃重累不輟讀聞一語城曰韓忠定有言勿文文弗省也勿多多弗竟也敬輿之後能為奏議者意惟忠定乎。此則城之目擊親聞於公者。後之人錄此數端以讀焚餘草者其庶幾乎。

汪思誠傳

余讀文信國幕府忠義錄與文信國所為前後指南集行府得人何其盛也。如杜許邦瀾趙時賞劉子俊蕭資輩殆數十人皆崎嶇險難久不悔卒以身殉。人謂信國誠知人能得士矣。而屬者燕山史公盡瘁抗節同符宋瑞獨是一時幕府鮮赫然著稱。

累累如曩日者。非無人也。我聞乙酉四月。流涕殉公者不少。以與公同盡。無能載筆志之。名湮沒弗章。豈不惜哉。如吾邑馬君應魁。汪君思誠是矣。思誠字純一。世為貴池人。居郡郭西。生而個儻好奇計。然始承父業。坐市肆。人莫之異也。自史公備兵池皖。清貞厲特異。君仰而奮曰。今世有此公。國事或濟乎。遂以身執役事公。公時方攬羣才。客日以進。獨陰察君有守而負機畧。可共大事。諸凡雜冗劇應屬公所者。悉使君與聞。是故史公備兵池皖。君左右池皖也。公開府舒濬。君左右舒濬。公司潛淮泗。君左右淮泗也。公司馬守留都。君左右留都也。公以閣臣總師維揚。君左右維揚也。公既委任無間。而君悉心籌畫以報知遇者。亦殫竭無餘力。至併命而後已。公敢戰好先士卒。故時或瀕危。而君能脫公於險。公清剛或不容人細過。而君以微辭解紛。俾人盡其用。公躬親事。如罰二十以上。皆自省決。而君於刑名錢穀碎細間。毫髮歷歷。俾無疑慮。公於靖南興平之構。持大義直折之。無屈辭。而君頗兼用游說。談言微中。關解而揚民以安。諸如此類。多祕不傳。惟幕府人稍能言之。君自隸幕下。歷官副總兵。居恆飲酒諧笑。若無大過人者。至臨事善斷。較然不欺。故卒慷慨從公。得死所云。嗟乎。公惟力守揚州。城陷而死。故君同日殞命。如此使公有潤州之脫。則君即杜梁閣金路分諸人也。使公有庾廣之師。空坑五陂之敗。則君即周處置趙大監蕭

路鈴劉監簿諸人也。得君一死士已足。而况其他乎。誰謂公幕無客者。公得人亦何減信國哉。君三子。長興國。亦事公授參將。先奉公命沂淮去。故不及於難。次興。周郡庠生。應魁。見余別紀。劉生曰。揚始陷時。羣知公死。純一從之。狀顯白矣。後忽言公固在何耶。或曰。亦幕下士所云。稱公未死。為已不死解也。夫公果未死。純一何以死哉。嗟乎。公於甲申冬。撰書辭。具馬幣。招余即幕。純一附赤牘。至為趣裝。余逡巡未去。至明年夏。難作。余雖未參幕事。公固知已。而純一亦同心人也。今豈惟負公。抑且愧純一矣。昔謝翱已嘗入幕。而自處可考。君子許之。余則悵然不足於心。以為終不若純一之慷慨殉公。為得其正也。

江陵詩社序

嚴首昇

予家在洞庭元石之間。十餘年來。聚同調數十人。為華容詩社。嗣是玉沙石壇油江。往來唱和。亦復十數人。今秋。著溪周子彝仲。謫還巴陵。集其一家言。及吳中名士近十人。與予社為一。頃共人樵之叔方宸青。五鍾朋玉。象岩。用梅凡八人。為江陵詩社。函其春吟若干首。以訊於予。予色然喜曰。何其盛也。夫詩淺事耳。然其興也。非一人事。建安以來。稱敵稱豪。七子四家。代不勝數。自元季迄明中葉。詩社浸盛。大約倡者弱冠和者劉髮。只在十年之內。蓋風氣使然矣。林九成有言。位高者無詩心。無位者無詩身。以予觀之。身與心未必遂可以詩也。司馬子長以絕世獨立之才。官太史。以為身軼軒寂落以為心。而賦讓楊馬。詩讓蘇李。假使子長生開元大歷間。豈復使李杜稱尊哉。何則。風氣然也。正嘉來。大雅寥濶。典刑獨存。吾楚蘊釀百餘年。今始大振。諸君子生當其時。皆積奇字。負夙譽。不終無位也。又不即有位。其身與心適足為詩。龍臺鶴澤之間。樓臺芳草。為吾楚最勝。入春已後。歌舞日夜無虛。天下名流四方至。無問乘傳擔簦。庵無不與諸君子邂逅為歡者。宜其詩多且佳也。竊嘗有言。詩厚物也。刺常似美。美不似刺。然常思羣羣不思怨。谷風無失其故。行野無失其親。詩中天。地不在人間。而況諸君子合志同方。永以為好者哉。其相視莫逆何如也。予家在洞

庭元石之間。族雖累世。身實僑寓耳。頃將稟室渚宮。歲時乘興。往來兩社間。諸君子其無以出國大夫待我也。

雲夢山人傳

雲夢山人孫斯億。字兆孺。華容人也。祖繼芳。成進士。官督學。父宜舉。孝廉。以高隱號。洞庭漁人。俱以詩名天下。山人生而慧且美。未韶以疹。七歲能賦詩。年十四。補弟子員。聲稱藉甚。父之上書督學。棄巾襪冠。束陳即渡江。如淮。覽京口三山。歷姑蘇。汎錢塘。徘徊會稽。天目之間。返憩金陵。歷豫章。再遊京師。日與世外人交。不袖一刺。還訪鹿門。登夢山。南謁衡岳。東入郢。北遊前門。百泉。高高所至。遍覽名勝。慷慨懷古。長嘯高歌。時人莫之測也。於時若王元美。汪伯玉諸公。靡不倒屣延致。山人傲然無所屈。意有所適。往往不謝去。浪遊數十年。未嘗以私干人。隨遇而止。時或乏絕。為逆旅人遺不恤也。山人曰。吾五十年來。雙履所歷。天下郡國十之五。所探名山水十之七。所交賢豪大夫士十之九。今其休乎。遂歸里。入元石山中。頽然自放。以終。遠近問字之士。日無虛席。天下無知不知咸稱雲夢山人。山人始古詩人之狂者也。生平不入狹邪。事祖母以孝聞。當分宜秉國時。楊忠愍沈經歷遇害者。直言論以泄其不平。江陵居首輔時。貽書父和甫諸公。有田疇責郭浩之意。比江陵卒。諸公徵起。則又

勉以不必出。務全晚節。識者韙之。見人善。多方獎與。見不善。則齧袂憤起。似不能容者。久之亦無所恨。其始稍戾俗。人亦卒解怨之。萬歷初。料民田。邑中競為隱弊。山人責令里正毋以私相愛。所得稅額獨重。里中長老訓子若弟者。輒口實山人不置。山人又古獨行者。流歟。年六十終。所著有雲夢園居鳴銑諸集。浮湘南岳中州北遊諸稿。子羽侯為庶吉士。有遂初集。孫穀官開府。有盤譜。蔡琳諸集。穀著古微書。行於世。惔著唐紀。皆以詩名。於是孫氏五六世皆文人。為楚望族。天下益稱雲夢山人云。外史曰。予嘗至澧水。見逆旅壁間有雲夢山人墨蹟。時主人年八十餘。頗能憶山人遺事。為予言。山人君子人也。流寓數旬。手口不輟。時或當食。投箸繞屋行吟數匝。乃復食。每上官見訪。稍不合。則拂衣起。人有挾貲鳴不平於山人者。叱不受。已乃秘為伸之。不令其人知。自山人去後六十年。文人韻士自四方來者。未見有山人若者也。嗚呼。山人君子人哉。

黃氏女羅氏合傳

黃氏。應山明經黃思閔之女也。少學書。略通古史。受涂氏長男聘。年十七而涂氏子病且篤。女請命於父。往訣。因袖刀至涂宅。竟曰。而涂氏子死。遂欲自刺。思閔故無子。泣下謂女曰。禮女未嫁則從父。汝父况無子。汝為夫死。如汝父何。女乃止。周身周衣。

從容經理。纖悉必謹。然後歸。再請父命。以其妹許涂氏次子。期年。父死。遺貲可千金。女三分之。以其一治父後事。葬祭皆成禮。其餘分半以予妹。而以其半予族弟。立為父後。條理井然。區畫無遺。告家眾曰。某乃今從涂氏子於地下矣。於是擇期歸於涂。初。思問存時。客有為女改嫁地者。言未畢。女即於室中舉刀截指。數指俱斷。客驚走出。故人皆知女志不可奪。至是莫有屈阻者。屆期。族黨皆具素冠以喪禮相送。女拜別。更拜父墳。哭盡哀去。觀者填路。無不泣下。至涂宅。不食七日死。死之前一日。應山令聞而奇之。亟詣涂宅。入室求一見。是時。女奄奄垂絕。猶引被覆面。不見邑令。邑令僅見其手。無左指。兀然一掌。歎息良久。為之泣下。涂氏厚殮之。與其長男同穴而封。應山令為勒石記其事。

羅氏。華容嚴循閑之妻也。循閑性通敏。喜飾儀容。好學廣交。善滑稽。開口而笑。無虛日。羅氏年十八。歸循閑。貌寢而拙。期年生一女。無何為循閑所棄。不入其室者十餘年。羅氏獨與其女共晨夕。拮据米鹽。不啻未亡人。然事舅姑彌謹。奉中饋無闕。每客至。循閑未嘗入謀。而盤杯應時具。雖罪戾同心者。容未逮也。於是循閑母及祖母及伯仲母咸責詈循閑。為羅氏不平。久之。循閑病。羅氏就侍牀側。煮藥進糜。夙夜不稍懈。者二百餘日。循閑病漸不可起。羅氏私自泣。目盡腫。抱其女屬姑曰。脫有不諱。當

以身殉。顧姑視此女如子。勿但以為孫也。比循閑死。羅氏哭盡哀。兩手拊地。十指冰裂。爪甲殆盡。姑令婢子輩防守。是夜漏盡。伺守者倦。縊於循閑棺側。同穴而封。里中人為歌。穀則異室死。則同穴之章。以誄之。頃之。其女亦死。循閑竟無後。

外史曰。黃女未婚。則能為夫死。羅氏見棄於其夫。而謹事之。卒以身殉。以視古今所傳節烈。皆加一等遠矣。黃氏從容就義。經年靡他。周旋節孝之間。文理爛然。殆類儒者。余客武昌。遇潭州沈孝廉訪楊忠烈逸事。因為余言黃氏女。蓋百里之內。十年之間。而剛大再塞於天地。何其盛也。循閑予伯氏子。予篤愛之。顧正氣在帷薄之間。而莫之重。何哉。

攝主論

毛先舒

宋蘇軾論攝主。毛子曰。甚哉蘇子之疏於持論也。軾之言。蓋引孔子以為君薨而世子生。則卿大夫士從攝主北而於西階南。謂古天子諸侯卿大夫之世子未生而死。則其弟若兄弟之子次當立者為攝主。子生而女。則攝主立。男也。則攝主退。援隱公季康子為證。而謂後世不當以母后攝。毛子曰。非也。古所謂攝主解者。以為上卿代主國事者為是。而非謂次當立者攝。彼此將無兩容之勢。而必大啟亂首者。毋受終於文祖。伊尹營桐宮。周公亦當國。厲王之流於彘也。周召二相行政事。號曰共和。皆是攝其政。非攝主也。蓋未嘗踐其位者也。春秋時。若鄭之縞與髡頑衛之叔武子瑕。公孫剽。皆有攝主之類。則已。構猜嫌而興殺戮。至適子未生。及君少為攝主。古惟魯隱公。康子二人而已。而皆不得免。隱公身罹鍾巫之禍。康子即位。正常逃而南。孺子之子亦殺。後世若宋太宗事。亦近於攝主。則廷美德昭。俱不得其死。禍敗之由。章章如是。古之人豈其見不及此。而忍為是禮也哉。子瞻之論。不亦疏歟。雖然。即攝主為次當立者。而孔子言之。殆舉古有此禮。而非謂後世之必可行也。夫古與今不同勢。故先王有盛節美政。多不可行。畧言之。如封建也。井田也。傳賢不傳子也。鄉舉里選。與以無子惡疾之去妻也。諒陰百官聽於冢宰三年也。天子五年一

巡狩也。此皆不可行者也。是故復封建。則樹兵而爭。復井田。地隘而不相容。則亂天下。不傳子。則啟窺伺而篡弑行。行鄉舉之法。必胥化偽。跪惡疾。無子而出其妻。恩誼則已薄。諒陰政聽於冢宰。則魁柄移。天子親出狩。則民勞。國亦危。吾故以謂後世若不幸有殂薨之變。太子未生。或已生。幼未能君。唯是母后與忠純大臣。互相輔政。以侍君之長。蓋大臣未必皆莽懿。而母后未必皆呂武。相輔亦相制。或庶幾無虞焉。失者十二三。而得者必十七八。終勝次富立者攝。斷乎罕能相全者也。然則僅有足為攝主者。亦可行歟。曰可矣。而必得如周公其人者。雖然。公當時特攝政耳。乃流言興而孺子疑。赤舄金縢。詩書所悲。君臣之間。幾不相保。嗚呼。亦危矣哉。

出處論

魏嵇康為司馬氏所殺。後山濤薦康。子紹於晉武帝。紹欲辭不就。濤曰。為君思之久矣。天地四時。猶有消息。況於人乎。紹乃應命。毛子曰。甚矣山濤一言而陷人於不孝。豈不謬乎。康本魏臣。連姻帝室。其龍性不馴。非果於自放也。見司馬氏有移鼎之勢。故幽憂慷慨。而時發於沈冥跌宕也。觀其賦詩託意。及不禮鍾會。告絕山濤。忠義之心。皎如星日。卒不免於東市之禍。夫乃心王室。而殺身以成仁。非康也乎。為之子者。能繼父志。滅國賊。此其大也。否則闔戶隱身。以示不臣。而稍信孝子之心。如王裒諸葛

覲等可也。若反面而事之。不孝之甚也。然晉書列紹於忠義者。以其死蕩陰耳。雖然忠之大者。不背孝。父之節為誰氏靖。而身為誰氏戮者乎。且康魏臣死魏。道之正也。父君之既得正。子得不君之乎。禮云。君前臣名。則并名其父。明君尊於父。父統於君也。忘父所君而事其仇。其得謂之忠也哉。夫四時消息。言常也。若處變固。非所論也。嚴冬固沍而火井不為寒。陰山不為燂暑。遂變為熱。豈其時運所可移也。然則父見殺。子竟不得仕於其朝乎。曰否。有本朝有異代。吾所論者。晉篡魏。乃殊代耳。若父被僇於本朝者。無相仇之禮。蓋父死非命而不可仇者二。一死於君。一死於法。死於君者。雖非法不得仇。如岳武穆之冤。而子孫仍仕於宋是也。死於法者。雖非君不得仇。如父犯姦盜等科。而被殺於姦盜之家是也。若夫既死於君。又死於法。豈有仇哉。而孰謂不復可仕哉。絲延。禹固佐舜。張湯誅而安世為漢名臣。其誰謂之受誅故也。然父死於君而非法。子雖毋敢仇。即弗仕焉可也。或曰父即有罪。子忍正名之為受誅乎。曰此有諱之而不得者。非謂正名之也。且刑賞王者之大法。是非天下之公義也。一人之私。固不可奪。亦非忍也。名曰幽厲。百世不能改也。夫非孝子慈孫歟。帝王且然。況臣下哉。斷曰。當革命而父忠先朝。為後朝殺者。子在後朝毋得仕。父誅於本朝而受誅者。子可仕。父誅於本朝而不受誅者。子可仕可不仕。以為父見殺。人子出處

之法

厚解

不薄之謂厚。天之積氣也。不厚無以生。地之積形也。不厚無以載。厚者。君子之敦行以事天者也。天之道有生有殺。人有喜怒哀樂。施之為德。則有仁有義。殺之為用。為反始。為復性。為成材。為藏氣。此所以為厚也。其在於人。義以制事。則肅而威。剛而斷。成務興治。冒道氣而上之。故君子之義。以成仁也。仁不得義。則仁不獨成。而仁豈成於薄耶。今世之能厚者少矣。故恆訓不足。每崇厚而黜薄。而遂至於厚薄無辨。吁。此亦言厚者之過也。天尊而地卑。陽倡而陰隨。球之道為器。而度之道為縣。此物之正情也。然統莫尊於朝廷。層遞而下。為公卿大夫。以至興隸。逆而上益尊。尊朝廷也。故古三命不齒於父兄。貴朝廷之爵也。乃有身列卿大夫。而周旋閭里。浮沉無蘭束。與負販細人為狎暱。曰是德謙也。不知自輕自輕者。薄其上矣。夫遠於細人。未嘗薄細人也。狎細人不足言厚。而所薄者大。君子之敬身。非徒為身。亦以身祖宗父母之身。故敬身者必自愛。遠非其類。至乃有與非類昵。曰吾同塵而葆光。夫葆光而不耀貞。不絕俗也。近非類必泥。何德之貞。不忍於小人。而忍於祖宗父母之身。非能厚者也。若此者。世亦多以厚名之矣。悲夫。吾又有見焉。愛友者必諫。愛子弟者必督之。豫宜

家室者必有禮。友過而不諫曰全交。子弟我戾而輒委之曰掩義。是之謂不相成。婦陵男。夫下妻。家室無禮。是之謂重否。主一家者待下以寬厚之屬也。然而法必設。防必豫。法不設。防不豫。陷罪在下。陷之在上。乃有益甚。記者奴置陵詬詈。不顧其主。主柔而容之。恃益以長。盜小曰可赦。至盜大益不問也。同輩姦亂曰常然。寢且及上而置之也。容惡長亂。顛倒冠履。縱勿問者。是自任情而慢天德。天且惡之。世之人且羣曰。是厚甚長者也。而是人亦遂益自信。是恃德之甚者也。夫害逆折者無害。罪已事者懲方來。如此則法制立而人心正。君子之怒。豈不厚哉。鋤稂以養苗也。刺獺以活魚也。一日縱惡。則善人喑。凶類慶矣。為民上者。則毋務姑息為政也。又毋務舍大姦而誅小惡。干果決之名。斯愈薄矣。治家。毋務優柔以養奸也。育子弟。毋務恤以長傲也。交友。毋務諧也。事君父者。毋務無諍也。脩身者。毋務無類也。愚之所然。聖之所否。道之所是。俗之所非。可弗辨耶。故君子盡仁義以事天。而飾喜怒以治人。是之謂天之道。

釋巧

有物曰樸。大巧是生。散樸為器。小巧斯形。小斯巧矣。巧斯小矣。故曰巧者非巧者也。非巧者大巧者也。行巧乃躋。辭巧乃窮。視巧乃淫。聽巧乃傾。拙巧成純。守於一貞人。

心猶水也。水寒則聚，熱則散。心苦則聚，甘則散。心散斯樸散矣。故善治心者，常置心於苦而不爽。夫食苦，眉頰猶飮，而況苦以作所邪？苦故聚，聚故不流，不流故不散。不散故不巧。巧有百利，心勞孔瘁，巧有一害。其害將大。累棋者不如置棋於几之安也。弄丸者不如握丸於掌之牢也。或難之曰：楚非僚安能勝敵？曰：苟善戰，安用丸？苟善國，安用戰？不此之脩，而徒彼之恃，幾拙矣。且夫吳師所以敗者，眩於巧也。楚為巧，逞吳為巧，眩而皆蔽於巧，故一敗一勝。使吳厲拙戰，視無巧，則一戰而楚可敗，而僚何施焉？故曰：一巧一拙，未知得失。巧弊拙成，久長大明。昔有巧者，善緣十丈之竿而升於顛，反身者三，旋身者十，千人之聚，色如股票，一人卧地而仰觀之，甚逸。巧者既下，亦倦而卧也。與觀者等，乃知鄉者之徒危也。故曰：鳶飛無用，輪椎可行。般之知也，其猶有所蔽者也。天道至巧也，天不尸巧而委諸地，地不尸巧而寓諸物，物維巧矣。不能常有，既作而復，巧於何以易？曰：復其見天地之心乎？言氣返而靜，巧蔽而樸，樸乃復也。

西湖子貢適越祠記

自古天子篤意於學宮。孔氏諸及門之賢者，皆得從祀端木氏之得祠，且偏郡國。今西湖之濱，又何以獨祠志適越也？何以記肇祀也？西湖之勝秀天下，自頃亂離，隄廢

不脩松柏摧落。九里六橋。蔚為叢薄。芄芄葑草。湖且為之淤。高臺廢苑。尋之幾復無路。况約版築。崇先賢之迹哉。自洛張公來蒞浙。五稔既旬。乃宣此邦之民。有衽席矣。自公多暇。時與同官載酒乎郊圻。臨眺於風日。於時春氣既宣。烟嵐如醉。樓船十楫。溯流如飛。顧而樂之。語諸公曰。美哉湖山之麗。昔之賢達。過此者眾矣。而紀績未彰。或竟已湮沒。茲不佞某幸矣。而獲與諸君子遊。萃於斯。雖征南康樂諸公。登峴山。望溟海。其何以過之乎。客或進曰。某聞昔子貢嘗適越。蓋有之乎。公曰。然。見於春秋外紀之書。而太史公信之。相傳信已久。或嘗疑其誣。雖然。孔子嘗從羣弟子。奉雅琴。以奏於越。句踐。句踐為陳闢下。以俳孔子。孔子辭而去。是孔子與諸弟子多適越。何有編衣白冠之士哉。昔北南途阻。學士多北方。而言偃故。以吳特聞。北方之士。鮮從南學。故疑之。且適越復何傷。聖賢之行哉。惟聖故能不凝於物。而與時相推移。惟賢故能不拘於墟。而攸往皆利見。禹入裸國。聘出流沙。伊何人歟。而顧沾沾焉。端木之是疑。斯曲學歟。若夫亂齊亡吳。伯越之說。紛紜五國間。似乎傾危。婢閭之所為。抑知子貢之心。未嘗存魯也。魯宗國也。扶危定難。激昂而赴之。遠適而用之。可智可愚。可誠可譏。可生可殺。遑問餘哉。則是役之不足為子貢病明甚。客曰。然則越絕之書。果信耶。曰。未可知也。苟云賢者車轍所屆。後之君子相與尋求故迹。而髣髴遺風。崇厥廟貌。

以志不衰。與其遇而疑之。弗如遇而信之。云爾。於是諸公皆喜。且互悠建祠之役。公益悅是舉。率先為倡。擇地於湖之東南岸。背柳洲。面雷峯。左帶湧金之堞。環呀萬雉。而右浹大湖萬頃之陂。周袤幾丈。崇敞幾楹。庀材計工。輒將競先。始事于某月日。落成于某月日。是日也。諸公皆至。設祀畢禮。而命不佞某紀之于石。永久之。爰追厥初。述事與言。弗敢煩其辭。若夫從游諸弟子。不得祠祠子貢。專事也。曷為不祠孔子。事鉅者不敢作。且不敢以外紀之傳疑。遽加諸聖人也。

沈去矜墓誌銘

臨平鎮在杭州東五十里。其地有瓶山。黃嶺。東湖。諸名勝。風土清曠而渾樸。住佳。工文持高節之士出焉。如唐邱丹。宋沈友直。皆是也。余友沈去矜。家臨平。高士也。卒將葬。子聖昭來乞余銘。余雖病卧。弗敢却。嗚呼。去矜與余同齒而生。光余九月。稚歲聞聲。即相慕。稍長。定交。蓋三十餘年。不寃好也。去矜少穎慧。六歲能辨四聲。長尤篤學。尤好為詩古文。雖僻處杭之東偏。而聲藉藉。吳越齊楚之士。過鼓邨。車輶恆滿。去矜形弱不勝衣。而骨性剛挺。平時與人語。氣辭厲。及發辯議。則電閃霆激。摧屈一坐。其為文章。遙澹秀鬱。錯以綺麗。商略輕重。不失銖黍。每自云。子美晚節。漸于詩律。細余何敢以麤心掉之。尚論古昔。洪然自任。而平居嘗不自快意。卒發孤憤。憶己卯庚辰。

之間流賊躡蜀豫轉入三晉時遣重臣將兵出率挫衄遁逃西北勢已危而大江以南蜚蝗從北來蔽天米一石值六七緡錢饑饉連數歲道瑾如麻士大夫方扼腕慷慨指陳時事聯絡風聲互相推舉懷古人攬轡登車之思焉是時逸真先生亦開章慶之堂多延文學士與去矜為周旋陸景宣為東南士類冠冕館於沈氏與諸公賦詩悲歌飲酒連日達夜余時卧病不得與然心嚮而馳蓋意氣猶壯也越四年天下亂客皆散去于是去矜遂自託迹方技絕口不談世務日與知己者余與張祖望登南樓抒嘯高吟樓東眺海西望皋亭羣峯蒼然大河南流酹酒臨風憑弔千古時稱為南樓三子景宣故亦南樓客也又與柴虎臣吳錦雯陳際叔孫宇台丁飛濤虞景銘稱西陵十子云去矜為人孝友父歿毀瘠嘔血東鄉盜起章慶堂焚堂本分居屬兩兄既殯去矜即割己宅居之久之兩兄欲徙去去矜念兄貧苦僦屋固留以讓兄自逸真先生歿母范夫人婦徐氏長子聖旭俱相繼亡去矜悲悼漸成疾疾數年竟卒年五十一所著東江集鈔詞韻詞譜南曲譜古今詞選臨平記沈氏族譜傳奇凡若干卷屬續時語聖昭以傳屬應嗣寅為之而託先舒銘墓先舒自己酉春病劇困甚三月十四日錦雯之官南河宴友生為別虎臣過要余偕往不能行去矜時買舟入會城視余乃明年正月虎臣死二月十三日去矜赴來是月錦雯卒于官三月凶

間亦至。余以死轉牀。尋之。具。不及週時。而三哭故人。唐韓愈云。人欲久不死而觀居此世者。何也。況人非果不死者乎。嗚呼。亦可悲已。先數年。景宣為僧。去於諱謙。其先為湖州武康人。十二世祖奇英。居臨平始。三傳為竹軒公。官九江府貳。十傳為逸真先生。諱士逸。去於尊公也。嘗為遊洋將軍。後以醫名家。子七。聖旭。聖昭。聖時。聖旦。聖曜。聖歷。聖暉。女孫二。去於嘗云。著作須手定。自刻庶保垂遠。若以俟子孫。恐故紙斤不足當二分值也。枯心落鬚。辛苦太極。已作北邙土。安能復知身後名邪。語罷太息。今聖昭與諸弟。竭力為亡父刻平生遺書。真可謂孝子也。已敬為銘曰。

鎮西山英鬱哉佳城。育壽是宅。幽人之貞。嗟麟不可脯。鳳不可烹。有道則見。嘉祥斯徵。或見或隱。厄乎時命。激而為文。孔陽且靈。辭以立誠。其道大宏。石鼓之無聲。桐扣之乃鳴。

沈孝女墓輓記

古錢唐沈孝女。父人驥。母周氏。嫁陸夫。名有奇。少即嫺婉。知盡孝。嫁而稱賢。母病。歸侍。母瀕殆。每云。父老弟少。母何可以死。兒願代母死。樂于生矣。母日益危。孝女乃伺夜鼓。深人悄。潛自割其左臂肉。血濡縷。不肯止。猶忍之。煎湯進母。母啜之盡。問母好否。曰好。乃退。仆者橙不能起。呼聲慘慘。父入。但曰。兒死矣。死矣。竟不言其故。其父

見血大流溢。驚而抱之。父之竟殞。及將歛。浴見創。而始知其以是亡。蓋使人知用藥
襄止血。亦可生。而必不言。世傳人知割股事。則病者無效。爾於是母病乃旋以魁身
代之。志竟符。奇孝格天信哉。然死而得易。是數可遷也。天又何不憐其孝而并赦之
也。茫茫蒼蒼。其孰能測之。或曰。毀受之父母之身。而又使親啗我之血。味陷之不慈。
豈得曰孝。余則曰不然。事有常有變。自其常而言之。則一髮一膚。皆當愛惜。自其變
而言之。則殺身致命。適以成仁。孝女蓋所謂處變者也。使母偏子割其肉。以謂不慈。
可也。我自割肉進諸母。母不知而嘗之。何不慈也。何陷之也。且凡國家值鼎革時。人
臣殉節而卒。無救於其亡。然必美之以為忠臣。今女一死而更活母。乃反不得為孝
子。又何也。曰。食人之食者。死人之事。臣道應爾。若沈氏則何為者。嗚呼。罔極之恩。竟
輕於食哉。孝女死年二十三。死在庚申閏八月一日丑時。後百日葬陸氏之阡。郡人
毛先舒為之記。且銘之。銘曰。

嗟乎。生誰不死。死其身。活其母。死非死。鬱為神。永俎豆。詔後人。倚人亦孰不為人之
子孫。

治河議

談遷

住河決開封之荊隆口。衝張秋壑。及大名東昌。累歲未塞。其哉河之為害溢也。病河即病漕。水之性善下。乘悍賁怒。似傾似駛。既決之後。窪地為淵。衍為澗。不得不歸。沿洄澶漫於受災之處。沒假勢漸縮。特遊波耳。決口已失。故道向之平流。今滿而奔。皆之數淺。今陸而沉。猶執常算以治之。其治之者幸也。何以言之。中原俱墳土。疏惡易潰。而河自積石龍門底柱析津。挾萬里建瓴之勢。束於一隄。又無他支河以弛之。方其循故道。見謂馮夷受職。而濁浪涵涵。波逝於上。渾墊於下。日積一卷。經歲累三百六十卷。受於不止尺矣。積歲以往。河身日高。而堤如故也。秦中多山岸。故不受決。入關以來。俱平野。夏秋間。黃水大發。能無激乎。激則潰。潰則隄且湮。野且濫。故道不復循。連數千里。以為魚鼈。古今通患也。於是思得水工而治之。亦無他策。分其流導其歸而已。禹治河至大陸。播為九河。復聚為逆河。以入於海。此分之導之之始也。河力雖悍。勢分則馴。河性雖亢。勢歸則順。周時井田。曰溝曰洫。皆分也。漢制瀕河二十里。不種亦分也。然武帝臨瓠子。成帝塞金堤。累歲始竣。治河豈易言哉。漢唐以來。河之歸海也。以北。自宋太宗時。河決溫縣。流入徐州。始入淮。真宗時。決鄆州。又入淮。於是河之歸於海。一合南清河以入。一合北清河以入。然南強而北弱。則淮之勢劇於沁。

衛汎汶沂濟也。而淮又不敵河。故不能刷河之淤。淤者漸壅。以底於極潰。河漕文病矣。荆陞口之決。見宏治二年。衝及張秋。又見萬曆十五年。長垣東明幾溺焉。而先朝卒以治。其法諒未加於今之日也。昔告元主。今朽杭車。何若是之相懸也。漢賈讓論治河。欲北徙冀州之民。當水衝者。決黎陽遮害亭。故河北入海。當敗壞城郭田廬。家墓以萬數。以為大禹治水。山陵當路者毀之。墮斷天地之性。此矯誣之說也。潘季馴曰。河性端悍。善溢。多徙者。流漫而沙壅也。法莫若以隄束水。以水攻沙。無散漫無填淤。河乃可治。治水者治其下流。今封邱陳留蘭陽。俱封陽穀壽張長垣東明汶上。睢邳之間。得無有伏於隱沙。為下流沈滯。又宿遷清河。其地仰易阻。俱河之委也。浚其於以倍隄之堅。隄外如遙隄縷隄。並得完善。然後塞決口。其功可翹足待也。今之日。或曰棄決口勿治。夫荆陞口決而棄之。將他道決亦棄之乎。或曰復古衛河運道。夫中原之民。烏狗矣。而又重困之。膏血幾何。疇其堪此大役。不可以中輟。大功不可以驟立。則當事者宜自審也。

黃石齋先生遺事

秋日過吳駿公先生所。時伏枕。語次。往及漳浦。數曰。吾登朝見諸名流。如錢牧齋陳臥子夏彝仲。才甚可。覩其跡。惟漳浦吾不能測。時在京邸。嘗攜榼四器造飲。先生僅

一童常不稿。劇論深夕。或出白麵一甌。不加鹽也。室無長物。書幾數帙。選宮僚楊伯祥被命。上章推讓。先生疏謝非其任。所注洪範四函。函各二帙。先正文夾注。字大如指。楮博八寸。修尺有二寸。並手書。雖引經史百氏之言。條源析委。從空几上。三月辦此稿本。亦雅潔。稍塗乙句字耳。既廷忤。脫獄。謫江右。幕而南。吾適遊西湖。返棹。馮元颺赴少司馬之命。同泊塘棲。忽傳福建黃太史至。意為先生也。同舟道。見小舫。以席。吾兩人登其首。踰席外。蓋舟輕不可貯足。少司馬語其童以名。先生大喜。延謝索鮑四拜訖。前被杖。雙股猶作楚。吾兩人各坐一橫木。先生坐板上。即寢處也。述近況四五語。即極言時事幹濟。憂危救傾。妮妮不止。吾兩人欲少致慰藉。無可著語。注易二帙。云得之姜里。蓬櫬跼踖。見襪被外。硯一筆三四。餘無毫纖。其童挹河水。瀹茗。坐久之。紹興司里陳臥子。湖州司理陳達情。俱以門人至。獨身入舟。語中夜而別。明日。先生遺書相勸。今思之。廉貞學行。著人耳目。元輔所不專望者。而先生自視。且尋常人。無介詞。無傑色。暇輒共吾不善。先生強之曰。第隨吾下。子又能繪人物。善分書。遇山水。策杖日數十里。不告倦。嘗未見其挾冊洛誦也。聞微時。綠樹啖松。晉累日。父寬以歸。編蓬為室。吳天下書。穴通飲食。三年出。應試。戊午乙榜。天啟辛酉。聯馬。意其學少年得力。噫。以朱雲狀育之。慙。以京房翼奉之奧。以仲舒劉向之文。曾不得。

一端名之殆神人也吳先生敘竟起坐曰足下喁喁道古如才學直師兼至並詣求之當前曾幾人哉予古橋而不能下歸書之燭下。

國朝文匯甲前集目錄

卷十七

周

簫

字青士號菴谷浙江嘉興人有采山堂集

蔡湘傳

海烈婦傳

書金文擊賊事

查

容

字韜荒號漸江浙江海甯人諸生有漸江文集鈔本

李雲田文集序

朱近修為可堂文集序

贈別繆天自序

海甯縣海愚記

林

璐

字玉遠號鹿盒浙江錢塘人前明諸生有歲寒堂存稿

王安石賈似道論

張江陵論

重刻文丞相集序

九 八 七 五 五 四 四 二 一 一

國朝文匯

卷十七

國學扶輪社印

揚清祠記

九

陸忠毅公傳

十一

司理溫公傳

十二

沈長公傳

十三

草薦先生傳

十四

臨海馮氏雙節傳

十五

來烈婦墓銘

十五

王

煒 號不庵安徽歙縣人有鴻逸堂集

春秋書法辨序

十七

黃山遊記

十八

程孝子傳

二十

吳虛齋小傳

二十一

談仲和紀事

二十二

黃孟通紀事

二十三

龔叻庵墓誌銘

二十四

黃晉良

號處庵福建閩縣人有和敬堂集

論官祿

二十六

吳騏

字曰千江蘇華亭人前明諸生入國朝適迹不出著有頤頤集八卷

白雲鄉遺稿序

二十七

林武宣貞娛草堂詩序

二十七

馮氏譜叙

二十八

謝文洊

字秋水號約齋江西南豐人前明諸生入本朝屏居程山以理學名有謝程山集

左傳濟變錄自序

二十九

彭師度

字古晉江蘇華亭人吳梅村謂與吳兆騫陳維崧為江左之三鳳

導問

三十

上嚴灝亭副憲書

三十

俊挺川集序

三十二

水繪庵二集序

三十二

處士王光承傳

三十三

李煥章

字鐵齋山東壽光人

辰隋司馬公傳

三十五

周夫人傳

三十五

國朝文匯甲前集卷十七

蔡湘傳

周 賈

蔡湘字松濤松江上海人也幼穎敏讀書目數行下里有童先生者授湘學悉以藏書畀湘因得縱覽博通年十八治裝別其父母曰兒居海濱終無所成就願北學中土庶從賢豪聞游歸侍大人未晚也遂渡江踰淮客齊魯已而轉入京師南海程職方見湘詩大為延譽於是萊陽宋觀察新城王考功皆迎致之湘才既高性又抗爽不肯脂韋從俗醉輒詈其坐人目為狂湘笑曰吾狂豈若輩所知耶沛縣閻山人飲合肥龔尚書坐尚書酌山人曰君名能相人此間誰定奇士山人睨視良久掀髯曰吾所知布衣一人殆異才公盍致之問其名曰上海蔡湘尚書立騎邀之湘敝衣冠惘惘而前一座為改容已各賦詩眾客方沉吟間而湘泚筆疾書不加點尚書擊節數其敏且工也自後飲讌必致湘有謂此狂士公奈何禮之尚書顧益重湘無間經歲西去踰井陘將歷龍門太華之勝經太原會嘔血太原周郡守館留之其友潘稼堂先在見湘稿向作多削去問之曰燔矣君其謂我畫地而趨乎即此亦烏足存庸詎知異日之不為灰燼乎其能降抑割美如此未幾之交城謁趙令君令君與語相得館之邑署旬餘始出龔宗伯程職方兩手書訝其初不以通曰公賢無須此所以出視

者不可沒兩公愛也在交署七月病劇潘自太原往視之執手泣曰君來吾瞑矣問所欲曰吾負大人吾負大人為吾謝職方君不及報矣頃時氣絕時壬子三月某日年二十六嗟乎痛矣湘長身面白哲善諧謔跡弛不羈中無城府交游有不合或至嫚罵去後未嘗語其短有所論述人稱之輒曰此吾師董先生之言非僕言也其詩矯健多逸氣雲間自大樽舒章諸公以風華相尚後學承襲湘能脫去之曰爾露母薄爾遊母庸故其詩不甚持擇然奇警處雖名宿遜勿逮其生平篤誼朋友臨歿懷職方與世之背本者異矣太原郡守既刻其遺詩而稼堂狀其始末余節之為傳云

周賈曰湘自負軼才所交游少當意者獨受知於程職方趙交城二君最深稼堂為余言湘病劇時交城竭多方醫藥不效死視含殮具棺衾甚周悉無吝死之慘先是嘉興徐孝廉次鏐病都門我眉庵趙君受其託以死又山陽范眉生病於家與疾赴長安囑後於趙君而死至是與湘而三湘無所遇於生而得託於死是亦可為長太息者矣

海烈婦傳

烈婦海氏者徐州陳有妻也美姿色以歲飢隨有量訪親吳淞間不值轉至毘陵

賢盡婦兄子某戍江陰。遇之道使僦屋居焉。有楊二者酒傭也。鬻沽其旁。誘婦數
貸錢有量。結兄弟。既覘婦不可犯。欲取貸。會漕卒林顯瑞次艘河下。二引窺曰。吾能
致若舟。林喜叩。故曰。彼夫婦思歸甚。託以簿計招其夫。彼得附還。徐無勿。詭林從之。
二持金告有量。有量以二誠愛己。償其貸。趣婦行。婦默計為二所賣。曰。吾死無日矣。
既登舟。顯瑞難其夫。遣市吳門。婦紉衣擁坐不卧。一日召優賽神。致酒饌。婦不為。
動。重謀之二。二曰。誘之金不然。力制顯瑞。使舟嫗懷金以進。烈婦面赤手顫。且罵且
詈。顯瑞心憚其嚴。然不能自克。夜鑿扉掩之。烈婦大呼殺人。持急呼益厲。鄰艘譁詰。
得脫。烈婦忿見凌。嗚咽泣。顯瑞屏息伺頃之聲。絕不知婦已自經矣。遑遽匿屍米中。
且重購逆殺有量者。初顯瑞祭神以盤覆牲血。毆長年藍九。九詭應以首監克。朱司
理檄經歷繆閱兒稽覓顯瑞所隸。曰得之矣。時夜已半。請鑰啟城。詔衛弁曰。奉檄勘
逃者。弁歷呼漕卒。至顯瑞曰。此是也。顯瑞欲致辨。見藍九乃伏。出驗其衷衣。結不可
解。繆惻然動容。急為棺斂。及有量歸質獄。已具司理覆讞論斬。而衛弁牒稱事由懟
夫。何與。顯瑞司理懼變。遣驛急詳諸監司。時顯瑞弟果走淮。控漕帥。如弁指詞入而
詳牒已允。顯瑞計窮。恨二始禍發其謀於官。斃之獄。郡人為建祠像烈婦於死所祀
焉。

周賈曰士君子當患難窮困久不失其操者蓋寡矣况婦人女子乎若烈婦轉徙道途艱苦備極而凜然守節愈固可不謂難歟至於一遇非禮視死如歸計不再決雖古稱烈丈夫又何加焉祠而祀之宜矣

書金文擊賊事

金文者業販鹽浙中為東南財賦之數而海濱斥鹵鹽賦興焉征推有使發撤有時給引於商者曰官鹽捨是悉為私販賣及買者兩罪之按緝巡邏舟楫四出往往緣之以為奸利小民持帶斤以上者輒傾奪不少假至豪貴有力及惡少年犯禁裝載盈艘則莫敢誰何所從來久矣文少與仲氏出沒江湖間凡販鹽之徒遇輒相要奪為利獨文兄弟所至人無敢撓者既而仇家縛仲刺兩目縱之文為稍戢來家禾之梅里歲丙戌鼎革之初愚民多相聚為盜距梅里半舍曰嘉會都者為其數穴四月下旬盜率黨來劫居民狼駭鼠奔恣其焚虜是夕文載鹽五六艘歸近市望見火光知有變乃部署諸艘退伏支港約曰賊歸繞出其前後呼應相接并力擊之賊可殲也乃率四五人往據移寶橋橋為賊歸要路文持藥餘人彎弓貫矢以俟羣盜舟方滿載首尾銜次相與謳歌笑樂是夜雲霧塞天相對皆黑莫辨而賊舟炬火獨明將至橋所十餘丈大呼詰曰來舟何為者盜錯愕固對矢發貫賊手賊遽擾亂後舟

詰之如前不能對。輒注射之。餘舟擠擁不敢復前。賊數十人乃執炬持器械捨舟登岸。適伏舟衝賊前至。呼詰相應。文輒持槩從橋上躍就之。左右刺賊前二舟。舟虜後賊皇遽亦多赴水以逃。文躍入賊舟橫刺之。是時伏舟出賊後者亦衝賊至。相與呼應。遂合力奮擊。聲震四野。賊不支。愈益擾亂。顛仆落水溺者甚衆。其登岸散走竄伏榛莽蘆荻間者。村人又撝括之。皆反手縛送文所。文至西塘口。南面坐。諸人持刀斧繩索立其旁以聽命。列羣盜於前。驗其衣濕及體裸者多。推入水中。聞或擲大焚之。其強武有力為賊首及偵探為賊耳目者。疑似間不能悉辨。死八九方是時。兵燹猶熾。民未安集。盜賊多有。故文以匹夫得生殺之。莫有非者。羣盜就戮。率恣意以逞。或繫樹仰射。或斷手足。或截腰剖腹。血肉淋漓。極為慘酷。而觀者方恨賊深。不以為怪也。是日有一塾師晨出。露草沾裾。疑盜也。縛而焚之。頃其徒來。始知故非盜。其他冤抑者可勝計哉。是役也。盜約計五百人。自溺死者三之一。縛而投水者五之一。斬斫焚燒死者十之一。餘則散走。村堡擊掠以死。其得免歸者不過十數人而已。然窟穴之間。餘孽猶在。聲言報復。文曰。賊來吾自當之。幸無恐。乃陳舟於扼以待。盜尋解散。里人多其功。向所載鹽大室斤率以百計。小戶以差減咸五其價償之。并所入盜遺金錢衣飾充溢棟宇。家大殷富矣。初文少壯無室。親酒家女新寡有姿容。且能持門。

戶求焉不獲。至是強擁負歸。人不敢問也。時有曹某者。曾與文角訟不相下。一日出郡。人舟皆失。蓋文陰賊之也。其縱恣頗如此。方其擊賊也。當事異之。欲招致麾下。文謝曰。某一介無他。能會賊自潰散。因擊之。某何功焉。卒不就。顧謂其曹曰。吾少無家室。嘗觸法犯禁。不以為慮。今幸有妻且衣食粗給。又安能趙趙俯仰。為人驅役耶。乃大治其屋宇。華美越常。製服用器具。務求精麗。日與其曹縱博劇飲。妻為擊鮮割脯佐之。未幾。晨出近鄉。竟為人磔殺。莫知主名。後鄉人有疾。嘗憑依焉。禱之。則愈。文雖匹夫之勇。然其擊賊。譬畫區處。膽識具見。真敵眾。逸待勞。頗合兵法。雖其生平睚眦恣睢。然其功吾里也。殊不可掩。後歲庚子。寒山盜劫里人百餘。勒金取贖。見害二十餘人。吾友王汾雅具難。假文而在。寒山賊或不敢至。即至亦未必劫掠至此極也。以此推文之功。固不得以匹夫微賤而概泯之。余重有感焉。故追書其事云。

周賈曰。誅殺者。生人之至慘。而刑戮者。王法之必慎也。況於匹夫而操生殺之柄者乎。文之奮志殺賊。真安居民。厥功偉矣。獨其殲夷諸盜。其間不無波濤。夫好生惡殺。天之道也。天何愛於盜賊。而文之死。若隱為之報者。天之示人深矣哉。

李雲田文集序

查容

嗚呼。文章至今日而極衰矣。衰之極盛之始也。蓋自司馬氏之亡世既遠而文亦變。愈變而愈衰。至唐而韓氏一振之。至宋而歐陽氏一振之。當是時學者彬彬然一歸於正。可謂盛哉。數百年以來。士之務高遠者。謂文章無益於身心性命。遂忽而不講。即有論述大抵變而語錄言人人殊。並周程諸儒之意而失之矣。至於佔畢帖括之。子。惟倖是圖。惟畫是侍。更不知何者為漢為唐為宋。甚矣斯文之不振也。且有一二赫赫然自命作家者。排唐軋宋。直追秦漢。天下之人。以為遂無唐宋矣。不知舍唐宋而唐宋不失其傳。為秦漢而秦漢將失其真。此文章顯晦絕續之際。邇非震川荆川。遵嚴諸子。後先起而振之。則滔滔者天下皆是。後之人非有出類拔萃之才。孰從而知之而辨之乎。余束髮為文。俯仰數千年。而知六藝者文章之根本。古聖賢精微在是。志力短淺。未易窺測。至於包括千古。牢籠萬態。自成一家言。莫如史記。學史記必先學韓歐陽。學韓歐陽則震川諸子。渡之楫。登之梯也。日與同志數人。此劇彼切。期於有成。顧今者紫色蠹聲。餘分閭位。所在多有。嗚呼。何衰也。楚有李子雲田者。人稱其能詩。李子亦自謂能詩。予再至漢陽。李子則出文百餘首。曰。此予三十年苦心為之者也。予為吾論定之。予觀其議論醇深。序事變化。蓋由震川以溯廬陵。昌黎而登

國朝文匯 卷十七

四

國學扶輪社印

龍門之堂與者嗟乎。聖伏賢往。羣言淆亂。而李子隱約著書。乃維斯道之一線。不亂於飢寒。不奪於勢位。可使得氣行志。成一代之書。高文典冊。抑尤有可觀者矣。後生小子。不知此中甘苦。徒見其兀兀窮年而筆墨之曰。此固詩而狂者也。今老且病矣。嗟夫。彼亦烏知文章之盛衰。斯人與關乎絕續也哉。李子集甚多。將鏤版以傳。張爾公先輩刪其十之五。予又刪其十之一。分為二卷。

朱近修為可堂文集序

久菴朱先生有為可堂文集詩集史論。凡數十卷。既梓之。傳誦於世矣。今又梓其文百餘首。曰未編稿。先生於余為大父行。不以余之不敏。俾余論述之。余惟古人有三不朽。立言者居其一。然言之無文。君子不取焉。甚矣言之難。而文之不易也。吾浙於唐虞三代時。僻在南服。聲教未通中國。春秋末。吳越以兵爭長。奇謀秘計之士乘時並出。名始震於諸侯。至漢而嚴忌夫子之徒。以辭賦應對得幸天子。稱貴顯矣。然皆邀利取勢。非有意乎立言者也。自漢以來。浙之士大夫。聲名日盛。其負著作以垂久遠。不勝數也。而千餘年之間。求其言之文者。惟陸敬輿一人。嗟夫。豈不難哉。宋南渡後。呂東萊接中原文獻之傳。倡道於藝。何王金鉉。遂為紫陽之世嫡。慈湖楊氏又為象山之宗子。而浙之理學始盛矣。當是時。陳葉輩以著述顯於朝。方謝等以唱和伏

於野黃柳吳三子。淵源有自。為有元儒林冠冕。而浙之文章始盛矣。蓋天地之氣自北而南。由宋至今。五百有餘歲。而氣之所鍾。吾浙獨當其盛。明初宋景濂出。極理學之精微。盡文章之博興。一時和者如王子充。學者如方希直。皆能擴其氣力以相鼓舞。遂成一代文治之隆。其後王伯安以獨絕之資。著書講學。學者翕然宗之。而浙之理學文章並盛。此又一變也。其在於今。光正之典。刑盡矣。學者苟且偷薄。務為剽攻。翼儻影附。響隨。哆然自以為得。而斯文如帶之緒。就從而振之。先生生當氣運轉移之會。伏處草莽。潛心述作。世之論者。以為善學韓蘇。抑豈知先生有志於宋方之學。而溯其淵源者乎。故其為文博而能精。約而能盡。倉倉濟濟。不規一家。而自成家大。而帝王致治之源。聖賢相傳之統。古今興衰得失之故。細而山川風俗。草木蟲魚。顯而士大夫之鴻才偉節。微而閨房婦女之嘉言美行。莫不燦然備列。如先生者可謂言之文矣。夫古之人大都遭時得位。經綸黼黻。光被千載。先生獨以名場宿老。寂寞著書。為吾浙中衰復古之倡。蓋立言之難。而其時尤不易得。此余讀先生之文。追述數千年作者。所由盛衰而不能無感於今也。

贈別繆天自序

余嘗論東漢之興。天子臨雍養老。側席求賢。徵車東泉。巖穴相望。士君子幸而生其

時不可謂不遇矣。而梁鴻之徒。牧豕賃舂。隱約以終其身。惟恐姓名之或見於世者何也。及觀其出關過京師。作五噫之歌。而知高人達士。輕世肆志。治亂不關其懷。至於流連俯仰之際。往往有不能釋然於中者。夫肅宗寬厚恭儉。稱守文令主。而鴻覽宮室之崔嵬。歎民生之劬勞。使鴻而遭漢季。見夫流離播遷。靡所定處。其與感更何如哉。或以謂古之逸民。入山恐不深入。林恐不密。鴻既肥遯。以自高矣。乃其陟北芒。瞻帝京。怛然以長歌。豈猶有物之累存耶。不知古人所以立身處世者。不必盡歸一軌。要在守其道成其志而已。昔井丹未嘗修刺侯人。以五王之貴盛。卒莫能致一旦。致於信陽侯。其後吳苞以講學聚朝士。聽者若禘。蕭遙光諸人。或迎至其家。或為之立館。當時論者。皆不掩其為高。而況於鴻乎。前卿曰。志意修則驕富貴。道義重則輕王公。夫富貴可驕。王公可輕。固未嘗絕也。士生斯世。時止則止。時行則行。豈必窮死一鄉。如黔婁鮑焦。惓惓矯情疾俗。而後為賢哉。吾友繆子天自志廣而行。懲取博而守約。大江南北。莫不慕義而願交。歲之五月。自吳遊燕。於其別為述古逸民之去就。以告之。若且渡黃河。升高臺。縱覽山川宮闕之勝。而慨焉以賦。又何必不如古人耶。此余所尤望於天自者也。

海甯為縣蓋始於吳王渚煮海為鹽曰鹽官兩漢為海鹽孫吳復為鹽官晉宋分鹽官海鹽二縣陳永定二年置海甯郡隋復為鹽官唐武德七年省入錢塘貞觀中復置宋因之元元貞二年改為中州延祐泰定間潮汐為患天歷二年始置為海甯州明洪武二年復為縣縣東西北皆桑田南並海去縣五十四里有赭山赭山斗入海與越龕山對峙潮從此出入是為海門往時浮海多由此見有物蜿蜒蓋蛟云父老謂海門吐納潮汐沂泗渟渚歲既久有渾如陸潮勢束而不舒回薄反擊故海甯多衝決崩潰之患理或然也唐以前不可考按吳地志捍海塘去城三里廣二丈高一丈長一百二十里開元九年重築唐時海固為患矣宋嘉定中海大決始見於史所謂海失故道是也元延祐泰定間海決尤甚縣故有新塘鹹塘淡塘范蠡塘捍海塘今惟有新塘淡塘餘埧不存塘外沙場二十餘里塘內牧地草蕩桑棗園凡一百六十七頃亦皆崩陷都水監張仲儀邑志作張仲仁為竹籠木植實以瓦石塞之又奇西僧術鑄深沙鐵神欲厭勝之決猶不止致和元年遣戶部尚書李家奴至鹽官祀海神議作石圍塞之又造浮圖凡二百十六為厭勝術後皆沉沒不可見蓋其術可賭矣明永樂九年海復決田陷一千九百餘頃戶喪六千七百有奇上遣保定侯孟瑛禮部侍郎易英之海甯祀神并歲支杭嘉湖蘇松常鎮七郡錢糧修築隄防者為令凡十

三年而患始息。成化甲午。海決逼城。用崇德沈涵築法。塘得以成。宏治壬子。漸決。嘉靖戊子。復決逼城。崇禎戊辰。復大決。田廬人畜壞以萬計。城不沒者數版而已。自戊辰至辛丑。凡三十四年。為清順治十八年。是夏大旱。而海甯邊海地勢高。苦旱尤甚。海決散入河流。民僅免漂溺之虞。而數百里內。蕭然盡為斥國矣。康熙三年甲辰。四年乙巳。連決不止。佳時。秋八月。潮汐乃盛。其來如萬馬奔騰。聲震動天地。至冬。衰歇。俗呼凍殺潮云。辰巳十月中。潮勢洶湧。暴怒。圯隄塌岸。齧城漫野。如秋盛時。蓋異事也。於時大吏某奉兩臺檄。至縣築塘禦海。凡三年。告成以去。先是乙巳秋。海甯再被決。百姓歌之曰。潮來尚可。吏來殺我。次年丙午。沙漸漲。彌望去潮益遠。而塘工未竣。百姓又歌曰。海不揚波。吏當奈何。然竟為立生祠。刻石頌功德也。嗚呼。亦可以見吾海甯風俗之厚矣。

王安石賈似道論

林璐

一日之利萬世之害。聖人所以惡言利。乃自古小人之誤人家國。必以利進其始。以裕國便民之策。聳動人主。為人主者。當圖計匱乏之時。驟聞其說。娓娓動聽。舉而行之。府藏頓盈。公私並給。以為其言果可用。而不料其禍之至此極也。宋王安石言利之徒也。神宗時。開邊生事。用兵靡餉。安石創為青苗助役均輸諸新法。剝民奉上。四海困窮。而北宋遂轉卒以亡。南宋至淳祐寶祐間。賈似道首創買公田之策。劉良貴吳勢卿等助之。藉口祖制限田。而實以聚斂困民。不數年而三宮北去。陵骨無存。傷已嗚呼。當神宗之世。承祖宗之積累。天下康甯。土地廣大。此時無王呂等立新法以擾之。天下當不危。南渡以後。小朝廷既不可以國。又加以秦檜韓侂胄史彌遠諸奸相繼耗散國脈。至理度二宗之世。天即不生似道。宋必亡。似道即不用事。無補於賊。獨怪江左遊魂。苟延殘喘。敵未壓境。民心潰散。以速其亡。而其流禍且歷宋而元而明。至於今未艾也。嘗考公田之制。初買之時。以官品計頃。以品格計數。將官戶田產逾限之數。抽三分之一。回買以充公田。是猶有抑強嫉富之意也。繼而數派除二百畝以下者免。餘各買三分之一。又後而百畝之家亦不免焉。官吏奉行。率以多買為功。有不勝任者。知臨安府劉良貴輒劾之。追毀出身。永不收錄。平江嘉興安吉常州

鎮江江陰買田皆有專官。而包恢在平江。至以肉刑從事。廖邦傑催督常州。害民特甚。至有本無田。而以歸併抑買自經者。浙西六郡買田多至三百餘萬畝。號曰公田。嗚呼。自秦商君廢井田。開阡陌。以至於宋。幾二千年。民俗習之。各田其田。各業其業。祖父以長其子孫。其間雖有多寡廣狹肥瘠之不同。而貧不必忌。富不必藏。今縱不能舉井田復之。反一旦取民間之田。不問可否。強進於公。且從而刻減其價。石租之田。償以十八界會子四十價錢。稍多則給銀絹各半。更多則給以度牒。告身。准直所得者虛告。而所失者實產。雖富民不免於破家失業。夫求國之富。不令國有富民。可乎哉。然而似道之意。未嘗以為病民也。假公田以為號。買之於民。非攘奪也。每歲秋租。特與饒減。有水旱則別議放數。民為官耕者。照例輸租。非有多取之名也。屈人主之尊。以為田主。田三百五十餘萬畝。歲收可得二三百萬餘石。賦稅常額之外。忽增此數。雖天下賢君。未有不顧而樂者。如王安石之創興新法。誠趙閱道曰。君輩祇坐不讀書耳。彼且自負其經術。作用欺世主。而有餘。豈知其流毒至於此哉。夫公田之名。昉于殷周。其時私田並屬公家。故有授田完田之制。非如似道之買私田為公田也。買私為公。則田數有定。盈於公。必縮於私。名是實非。而猶藉口於公田。執此二字。似道之罪已不勝誅。而又為立官倉以儲之。分司以主之。官佃以耕之。莊官以督之。比

及收租原額已虧則取足於田主或內有破瘠及租佃頑惡之類又從而責換于田主民產既去而獲累無窮比諸白晝擄掠之盜荼毒閭閻殆有甚焉明太祖起兵江南定天下興新政宜改矣而銜吳人為張士誠死守承元之舊以此苦之論者謂明祖開創太平豁達大度反以私怨讐其民似不如漢高復豐故事不知似道柄國時苟不作法于涼後世人主雖極刻薄寡恩又豈能創此苛政為困民計乎故當明初公田之稅每畝至九斗八升蘇通賦至七百九十一萬石民棄官田而逃者鄰田一佔足則執以償其賦良田皆廢而不耕宣德間周文襄公巡按江南始奏減歲課七十餘萬石其絕戶官田召佃開墾而薄其賦照民田例民命獲甦然公田之賦雖減而所減之賦仍均攤于民田凡州縣之公田其數少者民田稅輕其數多者民田稅重故至今浙西田賦輕重錯出要比浙東為加浮蓋似道變法之後四百五十餘年大害雖除餘毒未止嗚呼窮則變變則通獨利竇一開難以遏絕本朝深仁厚澤漸被四海前明江西瑞州臨江等賦多增至十餘萬蓋因陳友諒降將誤書冊籍以訛傳訛沿為定例而本朝盡豁除之則浙西田賦將來必獲裁減無疑也昔者范忠貞公開府兩浙欲奏減矣顧未竟厥施而去死矣舉國傷之嗚呼後之來者其亦體朝廷仁儉至意舉數百年來未盡革之弊一旦清之毋使忠貞遺愛不獲再見

也然而難矣。

張江陵論

蘇文定云。天下有權臣。有重臣。二者其迹相近而難明。凡為天下。宜有以養其重臣之威。使天下百官有所畏忌。而緩急之間。能有所堅忍。持重而不可奪。吾嘗據此以論江陵。江陵在時。舉世皆目為權臣者也。當時羣臣徒見其外而不見其內。見其侵天子之權。而不察其所為。誠有如文定所言者。由今視江陵。似是兩截人。觀其逐新鄭。廢遼王。奪情起復。幾於無上。觀其十五年之經濟。乘得為之時。優之以才。濟之以剛猛。驚而立功名。一時廷臣無出其右。原其意。以為非常之任。必待非常之人。能副之。舉朝因循玩愒。方且伺隙於我。而我無以肩之。則事必不濟。兩宮沖聖之倚毗。必不副當時觀場之人。無論已。百年以來。由學腐儒。動輒講王霸。辨義利。言體道。用。不察其本末。而概以攬權震主相加。即起江陵而責之。必不心服。夫世廟以來。無相久矣。生非文武成康而不識救時二字。要之孔子七日誅少正卯。亦救時耳。予以為逐新鄭。廢遼王。奪情起復。三者罪之大者也。其事載在國史。恬龍悖理。何疑焉。雖然。吾始猶疑之。使奪情果真出於上。諸臣宜調而劑之。不宜激遼王。烏得無罪。江陵不幸而諫其尺籍。得以私憾奏然乎否乎。遂新鄭是矣。聞宮之變。或出保之。殘刻江陵與

新鄭無深隱。既去而中以赤族之誅。必不忍揆之天理人情。必不至此。此三者。吾之所以疑也。雖然。我甯信之。豈惟信之。將以責之。此其事姑未辨。洪武初。罷丞相。以五品殿閣加孤卿名之曰閣臣。詞臣也。分其任於六曹。而職司票擬。其不賢者。竊一人之鼻息。以張威福。如城狐。如社鼠。其賢者。官中府中。幹旋調劑。上一閣揭。回以片言。而相之職止此矣。功可以竊。而罪可以譖。莫閣臣若。江陵起而憂之。欲舉相職。其進直解。進大寶箴。進帝鑑圖。欲天子敬學。進皇陵碑。進寶訓。進御札。欲天子法祖。裁進奉諫。營造。欲天子節儉。引見賢能。欲天子知吏治。圖百官於御屏。欲天子體羣臣。請大閱。欲天子念邊防。蠲逋賦。欲天子子庶民。絕餽遺。戒請詔。欲天子知大臣法。則小臣廉。不甯惟是。當江陵官翰苑時。即志期公輔。四方輶軒奉使歸者。必往為造請轍迹。所至戶口阨塞。山川形勢。地利平險。人民強弱。一劄而記之。肅皇帝二十餘年間。彼親見貴溪分宜。交相齟齬。而邊備廢弛。天子縱有所誅殺。卒無成功。一旦柄國。輔十齡天子。綢繆牖戶。措意邊防者為至。江陵非直相也。而直以相將將。故南北守禦百粵滇蜀。必付託得人。將相能効力者。量其才專其責。前其瑕。勵其志。鼓之以爵祿。假之以事權。凜之以三尺。破之以疑畏。責之以實效。數萬甲兵藏於胸。而指揮乎數千里之外。虛懷咨詢。前牘星馳。嘗有數什佰相君貴乎將士之心。而戴乎將

士之首戰勝攻取代為奏稿當以某事咨稟功成凱至又諭以朝意當以某辭入告某策善後勇怯強弱進退疾徐洞若觀火邊吏奏記政府命之親書以毋泄機宜又必命其書銜擇其重大緊要者一一陳說於天子之前而使至尊識其勞苦知其姓名故能縛大憝殲羣醜以奠安中夏者垂十年至江陵歿而享其餘威以固吾圉者又二十年此江陵所為舉相職也用能不遺餘力以綜庶務由是而嚴清又重驛遞度河工疏餉艘詢水利飭學校數名實辨職掌久視為具文者按實行之攬權震主之外世所謂益之以操切者也諸葛君曰願陛下責臣以實效不效則治臣之罪夫既已有實效矣兩宮沖聖知之舉朝知之而其心未必知之方其柄國時瞻睽致書賢者辨明心曲以為吾非不知府天下之怨既已肩其任矣吾欲貽沖聖以安不專必不一不斷必不成十年之間兩宮沖聖享其逸江陵處其勞兩宮沖聖任人則逸者也六曹大臣蔭其逸猶曰侵官乃委瑣齷齪者畏之有力無膽者妒之清正拘牽者非之畏難者怨之迎合者憚之道學者忌之深文排詆者疑之蜚語喧騰且曰江陵將反而欲虛心衡斷其功罪也胡可得哉雖然江陵三罪不可以不辨禁樂何地而奸宄得以闢入親藩入議而大臣不為援請時際晏安而金革何以變禮即欲曲為文致而罪已不容遁才大而溢任重而疏以忠君國之心而難以一切吐棄之意宛

似權臣所為嗚呼江陵直駢耳愚耳吾猶有說焉宰相為天子統百官如裘之有領門之有闥船之有舵宰相重則朝廷尊百務舉宰相輕則朝廷卑事權雜有明二百七十餘年惟江陵能識此意而罪不足以蔽功厥後江陵歿而詆江陵者非惟自輕而卒以誤國廟堂諸老委蛇無建白而使神考輕宰相惡諫官燕安無忌曠使四出宮闈挾寵九列無官朝堂不御封疆大患帷幄無謀平壤封貢辱國病民以門戶籌邊以朋黨任將道學呼朋僉壬引類紅旗督戰經撫不和一誤再誤官寺乘之而國不可為矣思陵之季撫髀思江陵巧於固位者即貌為江陵以欺主上納賄鉤黨之外無政事焉中原崩裂使天子降座而揖閭閻吾以為後之人可以恕江陵矣

重刻文丞相集序

此有宋廬陵少保右丞相信國文公之集而錢唐後學林瑤為之序曰嗚呼公豈必以文章重耶某過廬陵道出公祠下輒徘徊歎息未嘗不惜公之志悲公之遇徒懸公大節以酬宋養士之報也孝宗朝永康陳亮直言對策亟以復讐請至光宗始擢第一當是時偏安未久徒嘉其言而勿能用傳至理宗藉元減金方告廟飲至幾忘元之噬宋公是時抗腕對策豈欲以空言博上第者耶浮沉中外卒未獲大展其才至德祐始將兵入衛除知平江府留不遣更上分天下為四鎮敵不難却之議而朝廷

不報。未幾奉詔如元軍。而三宮北徙矣。公聞關浮海。崎嶇閩廣之交。片土圖存。明知無濟。獨以百折不磨之身。將羣羊以搏虎狼。嘗灑涕告人曰。國家養育臣庶三百年。吾庶幾以具殉之。作天下忠臣義士倡耳。當公之見執於五坡嶺也。身為俘囚。視死如歸。元之將重公禮。公。元之君若臣愛公慕公。改館公。獨宋故臣留夢炎等欲死公。夫元不殺公。公必不愛死。留夢炎忌公死。公視之與愛公等。乃百世而下。猶曰此非元殺之。而故宋之宰相殺之也。其視王炎午之勸死何如哉。廬陵人士習公之節義。讀公之文章。俎豆於鄉者已數百歲。迄於今。兵燹之後。懼遺集漫滅。復梓以新之。嗚呼。公豈必以文章重耶。泰和郭青螺曰。公衣帶中八詠。天下文章莫大乎是。然則州人士之梓公集也。意在斯乎。意在斯乎。

揚清祠記

揚清祠者何。祀鄉先生僉事王公琦。刑部郎中項公麟。而建也。肅皇帝時。御史唐公鳳儀。採少保胡端敏公言。忠莫如唐褚公清。莫如明王公項公。異代同里。乃樹坊於里門。曰忠清。置二公木主。附褚廟以祭。學使孔公天允曰。二公生同里。接武同朝。宜專祠與褚公同表。曰揚清與褚公異。在首輔軒使者。激揚風教。其勤且慎。不苟同如此。嗚呼。古稱鄭公鄉。高陽里。胥是意也。歷今百餘歲。雖國家代興。未嘗不崇忠孝。尚

廉節鄉先生歿而得祀於其鄉。居斯里者想見吾祖吾宗未必不望衡聯宇。勛節高風於今為烈。前賢之失傳。後人之羞也。幸也。里中父老猶能舉其名也。按王公始以孝廉事文皇帝。自學正擢御史。再陟外臺。領山西學政。備兵川東西。視項公位不為為不顯。服官三十年。不為不久。卒以寒餓死。余嘗咨嗟歎息。當太平盛時。跡比首陽。意必豁刻自處。好名為甚。顧令里中人悲縉紳以餓死。不亦辱朝廷而羞當世之士乎哉。及考其行事。寬仁平恕。活囚至七十餘人。誘掖多士。無峻容倨色。行部蜀中。盜賊解散。類如此。然後知公之守己為極嚴耳。嚴則辨義利於細行。無論却餽遺。辭廷賜。甚至黃歷一冊。義無重受。相傳公絕糧久。夫人出耳環易粟。詰其由來。若將浼已者。亟起墮諸河。給夫人曰。是贗物也。以故遂不得食而卒。潘臬賻金殮焉。明興以來。未之有也。項公生平不少概見。端敏去古未遠。其言不妄。王公苦饑。項公亦苦饑。王公有室廬。項公無室廬。晚年御史某為闕地誅茅居焉。嗚呼。惟王公能却天子百金。惟項公能受御史一廬。貧窶家居三十年。項公不效王公。而清與王公同。冷曹郎署。當景泰天順間。時勢紛更。較之文皇時。臣節稍媚矣。吾讀其應詔陳言一疏。未嘗不凜凜也。其畧云。李賢王翱當曹吉祥之變。不能奮身死義。甘心屈膝以圖苟免。不知節義廉恥為何物。宜正典刑以訓有位。夫李賢王翱賢者也。公親與同朝。必有以洞

悉其本原而侃侃形諸章奏公之立身益可知矣以視褚公為忠為清皆臣極也父老生具里者亦與有榮施哉是為誌

陸忠毅公傳

公姓陸氏名培字鯤庭號曰邵叟始祖彥端公自汴州扈蹕而南十三傳至公父吉水公俱為錢塘人公同產兄弟六伯曰圻叔曰堦與公先有聲公兒時即尚氣決意或小許輒流涕誓死母表及大母絕憐愛之既長兄弟名益著與婁東雲間倡道東南陳給事大樽嘗曰某與陸氏交同孔融在紀羣間矣公十六補諸生十七娶婦陳十八吉水公方釋褐初授永豐令豐多逋賦吉水公伏闕上書請蠲租然後到官公大母樂里居吉水公留公侍養諸父強之行曰豫章多才可求友讀書官署兄弟以書下酒蟲飲暢辨聲徹垣外擊柝者遲鈴聲驚聽歲已卯歸赴省試舉於鄉公歸拜大母堂下喜曰汝父汝叔歌鹿鳴如昨日吾年垂八十猶見汝成名國恩厚勉之明年公成進士大母卒吉水公徒跣奔喪公亦需次旋里又明年卒已吉水公歿於南徐公曰行數百里跪樞前呼號動地手自搏其頤頤盡腫更以齒齧臂血肉淋漓與淚俱下左右莫能仰視公平居杜門讀書與同郡名士摩切為古文辭交徧海內而好引掖後進即負才未登公門者一郡中恥與為友公才高早遠丰稜峻整嘗冠我

冠紗覆肩背。然性好面折人過。居恆議論風生。無所屈撓。邪惡者見公。輒屏氣噤。噤
逡巡避去。御史中丞潛夫陳公偶忤於俗。公移書疾之。同年生姚公奇尤勸止公。公
弗善也。嘗與陸君驥武客秣陵。弔方正學墓。及徐常功臣廟。歎歎久之。客贈陸君弓
矢。陸方賦詩。公愀然曰。神州坐視陸沈。某鹿鹿無所樹立。以君之才。當上馬殺賊。下
馬草露布。差快人意。坐逆旅。日讀史。酣飲經月。一夜覺身漸短。可三四寸。良久方能
引長。歲甲申。逆閹犯闕。北向長號。思攀龍髯。其婦亟止之曰。君素稱讀史。不聞晉宋
間事乎。猶有待。未幾赴建康。拜行人。棲遲冷署。十月。副熊給事汝霖持節祭淮。潘熊
負直諫聲。與公談時事。益扼腕。明年乙酉。亂兵潰江上。公兄弟奉母居鹽官。公命其
子繁。召從省會。驚然。公遂避入黃山之桐塢。經友人陳君廷會居。握手流涕曰。行將
別君。陳君欲止公。公曰。即死無益國家。聊以塞責。婦飭左右守公。公笑曰。死豈可復
生乎。吾母春秋高。當避桃源。抱犢耕矣。閨戶自經。為客救免。又一夕。晨起呼紙筆。冠
帶北向叩頭者五。南向叩頭者三。以機繩授二僕。再拜笑語之曰。若屬知乃公意可
便相成。遂上大床坐。從容就縊而卒。凡上書三函。一奉母。一遺兄弟。一別故友。計公
成進士凡六年。年僅二十有八而死。婦誓死從公。自縊墜地。若有神持之者。又餓經
旬不死。姑表語曰。是天欲生汝也。遭天不祥。乃不死。公死未逾年。陳給事就縛復奮。

身沈淵死御史中丞陳公笑携妻妾赴激湍死熊公入閩鄭逆忌公沈於海與子俱死遷客自海南來云姚公奇尤自刎其頭死笑嗚呼如四人者可稱公死友然同郡王別駕道煥聞公死亦死江東贈公謚曰忠毅而不及道煥董戶部守諭曰兩人同死豈以道煥非進士耶乃得謚節愍云

林瑄曰公母初娠時夢神人羽葆鼓吹從雲際直墮入懷始生公公少時丰神英毅博學擅江右公文成四方目之曰西陵體及登賢書于太傅忠肅入夢與語語甚秘世莫有能解之者沈君鼎新暴卒而夢見公與某某方副冥司如王新建故事嗚呼忠孝人極也惟不愧乎人斯乃可以為神烏足怪余故傳之以備修史者採擇焉

司理溫公傳

溫公名以介號實忠相國體仁之族弟也丙子舉於鄉更名璜成進士官欽司理公幼孤自襁褓至壯皆稟母教母著家訓數十篇比顏柳母死私謚曰節孝太君凡歲時伏臘或災祥水旱為文告母歲辛巳大禱斗米值金一環羞糴穀為糗粒恐母為九原又為文告母公館於相國最久閉戶讀易語執經者曰聖人且韋編三絕矣研精覃思作易學總論及義卦圖說行藏用舍悉本於易相國在經筵每進講必先詔公平臺召對多稱旨公曰主上英明思擴能行相兄矣頃者加意江陵卹典兄知之

乎主上察如神者而廷臣猜忌如江陵時較甚。公為剖晰易理倚伏消長之幾。古相臣之事。惟乾三四爻可當之。餘卦皆季世君臣事耳。三四兩繇不出危疑二字。而疑甚於危。兄孟預籌諸未幾果爰立。與雲間義興嘉善吳門相終始。中間互為是非。互相激排。凡八年。公告相國毋隘毋疑。相國雖未必盡從公。公還里。相國猶問訊不絕。心重公卓識云。公自丙子三上春官。癸未始第。明年帝崩於煤山。公痛哭北向拜曰。小臣璜大行皇帝所齋板而登也。不能執干戈衛社稷。使吾君蒙難。生不如死。已而司理歙州稱畿輔重地。頗聞建康事。歎息泣下曰。已矣。繕甲兵為城守計。大兵雲集。力不支。公集家人告之曰。吾老矣。幸生二子。吾將從節孝地下。命蒼頭抱持去。庶幾續先人祀。城破。公拔劍殺其婦及妾。更揮劍自刎。喉未斷。吏卒哀之。傳以藥。公怒。手爬搔去之。創甚。七日而死。

林路曰。高麗寺僧止水云。公平居寬厚。貌似長者。未嘗有疾言遽色。死時勇決如此。公同年生關公鍵為予言。公與相國最友于。如同懷兄弟。然始終無幾微攀援意。年老服官。稟慈訓不少衰。嗚呼。求忠臣者必於孝子之門哉。公二子郊瑞祈瑞。長父遺集十二卷。藏於家。

沈長公傳

勝國未有沈君齊賢者字寤伊錢塘諸生也。髫年讀書以尺寸計執經問難師為屢訛。既長慨然以濟時為己任。然性峭直語不合輒詈其同舍生。生目之曰禍生。君曰固也。君等使如曹蜎李志父病引臂肉療之弗起。慟幾絕。嘗送賈樓水被盜盜故嘉禾沈升也。盜欲殺君。會杭李官舟至援以免。嘉禾郡丞庇盜且為盜居。聞暮夜餽君金。君不受。久之分巡浙西者曲為盜讐。君移牒被君儒衣。君抗辯不屈。李君故持平者卒直君丞以譴去。一時司刑者目君為強項生。時流寇充斥震及鳳陽寢園江浙騷動治兵者議登陴。君笑曰寇未至而勞民吳益流涕上書開府請餉不知措。兵不知用地不知屯。民不知恤。求於具文畫界而保以聽寇之蹂躪可乎。書人不省。君憾憤如家事常被酒入神廟痛哭失聲。同行者駭而避去。越二年甲申思陵殉社稷。君隨鄉耆紳俛哭臨三日不粒食者經旬。復私立木主於里社朝拜畢即伏地哭。署其楹曰臣身誓死君讐必報社故有雷神。殛猶可畏。君怒目叱曰汝亦當為國捍禦。徒金睛赤髮驚里媼乎。閭巷小兒環視而笑。君起逐之一市人皆以為癡。家人勸君飯進肉。怒曰此豈食肉時耶。更以惡草進。家人瞋君若遊喉不能下咽者。笑而去。君不時悲嘆客或阻君。君曰毋阻我哭。哭竟當自止。會會稽御史大夫劉公至。君亟往謁。扼腕論時事聲淚俱下。諸儒咸白冠環坐。一生忽私語曰黃巢朱溫恐亦天命。君直前

奮拳毆之急逸去乃免一夕客假君舍會食客故以肯雄鄉里者君笑曰丈夫當散財為國家效尺寸吾視若曹園豕耳拔壁上劍玩弄起舞劍光與燭光相射怒指四座吾當盡取若首自刎其頭以酬若客驚懼匿几下或逃溷廁以免鄰或偶語恐君知相示以目先是前數年督師汪喬年發闖祖墓墓有燈檠火尚熒熒不息屍骨腦後穴一赤蛇飛而走迎日吞氣者三復入墓發而殲之君聞之喜曰滅寇必矣及甲申難作君語人曰前言豈妄乎當再俟之已而南都立君歎曰江左敬仲安在哉獻策闕下恥以口舌得官遂避迹皋亭山下乙酉闖入九宮山謁元帝廟神擊之仆地為村農所斃君不知也丁亥北來客過君道故君躍起曰神能報君讐乎吾少時期為張代州今乃不及吳門許秀才吾其死矣寢疾數日執弟之手曰吾孔孟一線尚在語不他及聲有餘慟而沒

林璐曰予過君里中父老指揚清祠云此即君置木主處也猶咋舌嫻笑曰此豈古所稱狂者也君壯歲本河圖大衍而旁及兵法天文律呂著書三教書成生子遂命名敬圖其意深矣

草薦先生傳

草薦先生不知其名字氏族始居豐樂橋南又徙而之鐵冶嶺經歲不出戶一日偕

客訪其居童子曰方卧薦上未敢通曰移晷便披其帷聞其無人已而床上有聲聲歎
賈唾壺狀始盤旋下床立帳啟露薦語曰天寒甚客從何方來先生裹纈情加以布
帽帽束帨望之頭上長二尺許坐語移時呼童子進酒衣厚如重鎧袖臃腫手不得
卒把杯三人擁爐坐望其床薦高於几迫而視之計二十八簾夫床高五尺耳受薦
二十八簾簾以寸計高二尺八寸受卧止二尺餘扳而上如登山偃而下如墜谷勞
矣無何先生醉又上薦卧案上詩文高與薦等與客竊而讀之似不從人間來客大
笑曰昔司馬子長好遊故其文日益奇乃公踖踖戶庭固以薦上得之者也先生踞
薦不得坐忽下床曰客惡知我我束髮以還冬月御夾衣客至嘗剉薦以飼馬客去
徑上床卧又素好遊醉扣舷歌或墮水濕衣冰淅淅衣上不知寒而日與名公卿賢
豪長者相把臂先生昔遊雲間識彝仲夏先生及令子存古遊越師事念臺劉先生
與李官大樽陳先生又識世培祁先生文學王懸趾先生吳門則交葉君聖野雪苑
則交侯君仲衡毘陵則渾君遜菴豫章則王君軫石子浮屠氏乃與南屏翁公久遊
先生又曰嗚呼自吾遊至今三十餘年矣今其人皆以逝故鄉好友自陸大行鯤庭
殉國死諸君子三十年間或出或處意趣各殊然南皮北海分曹賦詩歲歲修禊事
以為娛樂迄於今有蟬蛻軒冕者有山林終者有自髡頂為僧者有小草生寒纈者

有起以大慰蒼生者有墓木已拱久者有糊口四方金盡表敝者有憔悴且行吟者吾老矣猶得卧薦上追季秋甄益薦吾不意竟益至二十八簾也汝慎無言吾又將卧于是里中人咸呼曰草薦先生云或曰先生毛氏名先舒字稚黃古錢塘人

臨海馮氏雙節傳

節母姓陳氏名珍字蘭玉諸生馮元鼎之妻也父名舉易官河東縣使歸節母偕元鼎奉養十餘年節母年二十九元鼎卒踰兩月舅痛子死亦感疾卒馮世仕宦皆廉吏節母拮据治兩喪咸暮盜入室節母趨樓下盜以挺擊人中節母腦流血仆地羣婢掖之避節母忍創伏柩側不肯去而家益落矣節母幼能詩當元鼎之存也閨中唱和清心玉映有林下風騷雅大故手幼子紹祖呱呱而泣長繩祖年十歲次繼祖年七歲荼苦三十有一年臨疾不肯問醫藥曰夫死稱未亡人行將見夫地下豈更求活耶獨繼祖早夭撫孫甦甦成進士十三年與新婦戴節母同日被旌戴節母有繼祖之妻而陳節母之子婦也名唐儼字伯音陳節母既孀居延明經戴景霞誨繩祖繼祖肩隨入塾迥異常兒乃以女字焉比成婚甫三載繼祖以痘卒生子甦纔數月耳從祖爭財攜甦節母抱甦泣曰吾之生也如敝屣徒以馮氏一塊肉在陳節母憐之甦能言即授書膝上既就外傳不能供饘粥舅隣甥遷節母郡城市宅三十

金更鬻簪珥貸於農歲歲進子穀以餬口。節母念姑時時命甦以履烏甘旨進未嘗不涕泣陳節母亦泣問新婦安否若安得餘而繼繼如此甦成進士歸拜母堂下節母泣曰汝尚記祖母授書時乎從子宦滇久及謀歸中途寇作以偽檄阻回情浪而卒卒年六十九距夫死蓋四十六年云子甦官至少司寇。

林璐曰馮氏兩世節婦在戴淑人為尤難姑雖弱一个尚兩子侍養乃至抱半歲孤兒作巾幗程嬰詎料有今日耶婦人立身莫大於節世知有夫死而節見未聞有夫存而見節者戴淑人家居時孫永年方娠身與馬中翰婦有指腹言其後阻亂成婚彭氏馬氏女親見永年伉儷旋里猶守貞不字彭孺人賢之請於舅姑迎歸同室嗚呼若馬婦人真能以節事夫者也當在滇時永年有姊曰柔婚於何凡八月而婿文鉞客死撫遺腹子曰柏章至十歲始攜歸拜舅姑聞者亦為泣下細常節義卒於一門牽連書之以告天下之為節母節婦者能以生死存亡而不易其心則幾矣

來烈婦墓銘

臣無二君妻無二夫經世之大防也世衰道微若可鋤而去之以委蛇於其間而人類幾乎息矣子夏曰事君能致其身身為君有則委其身以事君猶之守其身以事夫臣道也亦妻道也蕭山烈婦姓來氏父曰逢期許字西陵諸生沈驥烈婦喪母甲

申迎婿結褵明年乙酉江上大用兵烈婦家長河賊族謀曰冠山可避湘湖可隱烈婦方娠身不果遷明年丙戌父婿欲避會稽龍尾山先行謀寓舍而烈婦已舉子五月三日王師渡江潰兵滿野烈婦與嫂何氏艤舟於門不得出急語嫂曰名不可污身不可辱吾與嫂魂魄登冠山望夫歸矣呼婢玉蘭汝若無恙可坐此以待爾主抱幼子而泣牽嫂衣沈湖波深處越數日驢微行至湖口見故時婢卧渡頭苦以故浮屍水面兩人猶聯袂也裹布被掩於土穴明年丁亥遷入和屍尚如生兄哭其妹父哭其女夫哭其妻道旁過者皆為泣下嗚呼臣之事君猶妻之事夫說者謂臣不敢不忠乎君猶之妻不可身辱乎夫然吾讀史至受禪勸進自黃初作俑延及五季罔知臣節未嘗不歎息痛恨於若而人也史稱陳江總隋裴矩晉馮道之三臣者為醺婦所羞然則婦之身可一辱乎有明末造朝紳媚閹即棄喜廟而醺閹越甲申朝紳迎閹即背思陵而醺閹卒賴王朝一雪君仇何圖二女子同心自矢甘效汨羅以潔其身乎越三十有餘年其子世楷請於父曰男為人後母氏大節幸載邑乘家前片石非林先生無以銘吾母者銘曰

天崩地折青龍木猴天墜飛來再絢薰猶迎變畫錦兒戲浮溫市人節度田父兜鍪豈無謀國取口咻咻宵人竊柄覆車相侔誰謂巾幗大節是求身不可辱重於公侯

國朝文匯

卷十七

十六

國學扶輪社印

山推石斷嘉結雲愁湘湖清池二女翱翔凡百有佳鑒此清池

春秋書法辨序

王煒

古聖王之治不可得而見見於康衢之謠曰不識不知順帝之則當此時何取於言
執至命契為司徒而教以人倫別於禽獸乃始有五帝之訓天下萬世之人遵之則
治背之則亂治亂相尋治常不勝亂後聖憂之揭訓以為經繼起之賢因刪定贅修
之後求其說以淑於身即以其身所證而還以說經於是乎有經學天下萬世之人未
必知聖賢所憂所證也君師教於上則下罔不承習久志定至今家傳戶誦有若布
帛菽粟然以為之循持宜眾志之定於一乃才智之士往往多瀆於倫常之外者上
以得士求下以進取應上以祿位旌其學下以富貴快其私不復知經學本以明
倫相與顯然悖之而無忌嗟乎有志之士欲起而救之非置身倫訓之中大揭聖人
之經辨明其學以指其歸趨豈更有他道哉六經皆明倫之典春秋因事著義於曰
用為尤切自王公以迄士庶無一非春秋中人即無一人不當知春秋之義蓋春秋
之義不明於天下久矣崇明宋先生子猶憫斯世之橫流欲盡抒厥義而有所不可
爰取弑君一例即三傳之言詳其始終摘其淆誤以還經旨於無蔽夫聖經如日麗
天本無待於傳春秋之義屬辭比事三傳以事得附經而行後之學者因經以徵事
因事而信傳疑經胡不思左氏班在孔門公穀受經子夏三子之言期於翼經耳當

夫子筆削時游夏尚不能以一辭贊乃敢致疑於經妄生意見務新一時之耳目豈獨聖門不容且並得罪於三子矣春秋大義公天下學者當篤信於經則事之曲折盡為大義之所在有其事而不必可據者吾斷之以義無其事而可定其案者吾斷之以經或信或疑或隱或顯莫不有微旨存焉蓋一語一事一義聖人微旨不必盡在此一語句能合一時情事比而求之則微旨出矣此讀春秋之法也宋先生敦倫一行憲難弗渝不愧春秋之賢者其辨弑君書法為條百十有九以詳三十六君弑事本末事詳而當日之情與書賊之外書國人書國書卒書盜之微旨就常情而推論之無不曉然若出於人人意中雖其間例變情殊無不以復讐為義就君臣一倫以槩夫四倫之際先生說經如是而已嗚呼若先生者是真能以身為教者也首董仲舒作春秋決獄二百餘條朝廷有大議遣使就其家問之令之治春秋者不乏人試徵其行誰為無忝倫常者使其以春秋斷事能免於廢封之對而無發觀者之聚乎唐虞之風不可企矣吾意有願治之君投戈講藝息馬論道起太學建辟雍以更老尊先生先生為之陳三代之治析義利之源成天下之人才正千古之學術使六經高於中天更無有不可盡之說此固海內身於學者願樂之所同蓋不獨予與先生之志也矣

黃山遊記

博厚高深離奇峭拔險仄詭幻秀冶幽折山之神理也得三足以表名區得五足以
詫海宇至於備衆美以為觀而益之以雪瀑風泉瓊枝鐵幹處處成賞者吾於黃山
見之山高九百仞旁薄幾二百里北宣而南歛歛之二隅曰雲谷湯院宣曰翠微松
谷為峰三十六而天都為之冠峰有各源巖洞數十朱砂一泉尤為超軼自唐天寶
間靈閔始挾宋元以還稍見篇咏然或得其一端或撮其膚蟻大體之全付之猿猴
跳擲耳萬歷中普門老人以大士願力鑿空表異遊者始無息心崖岫之恨予以庚
子八月偕浙江老衲入自湯院澗流瀾瀾天都插霄青巒紫石少嘗饒目而神已躍
然天際矣既得湯泉解衣而浴縛石錯前晶砂布底貫珠蟹眼粲然上發芳鮮清逸
迥異他泉泉之溫者多伏硫而此獨為硃砂源其最勝也崖間冷泉一綫射入不混
以身受之沁快心骨此湯若現觸境圓通恨古今無人酬對耳泉外澗流即白龍潭
之委潭以色勝空青幻碧無以喻之若雨後披騰何地無有潭之上為藥鉢淺激可
喜又上為藥溪又澗而上為丹井澗石如規成也踞丹井之澗為虎頭巖為醉石而
鳴絃泉淙淙壁間亦自幽絕沿藏舟壑再折得桃花澗石梁架烟空桃花峰駢攢掩
映自是度嶺去則雲門外峰矣返宿桃源狎浪閣閣臨潭上雷濤撼枕通夕不寐晨

起上慈光寺。拜普門大師。塙寺左木蓮花一株亦非塵中物。自塙後壘磴而上。叢木森鬱。天光全移。穿援其中。但有酣綠。如寒魚泳。折折不盡。予笑謂漸公曰。我輩如是。不知誰為濠上觀。且作山靈供養可也。少息。觀音巖。再上則龍翻石。慘盡天開。得仙人峰。峰頭二石如老人對坐。捷步躡之。朱砂峰直展間石齒耳。遙見天都之半。奇樹遮空。古松前引如導。以次接肩疊躡。相沿絕壁轉而右。一石如大士巾。立松挺其掌。若俗稱楊枝類者說矣。黔羸亦大兒戲矣。右折石壁由小心坡而進。得怪松曰卧龍石。削女牆。引根附脊。滋石之醜。悍其天矯。不覺歎絕。過此徑益陡迫。覘覘無巘可抵。指趾相輔以度。徑窮入石窰。梯而上。若出井中。即文殊院。左天都右蓮花。蒼然天半。羣峰脰侍。坐石臺如觀項羽。逼章邯。騰蒼雄紫病骨為壯。遠峰萬疊羅拜於前。正諸侯踞謁時也。暮色已合。漸公猶卧石上不忍去。是夜宿文殊院。蟲鳥聲絕。魂夢幽寂。破曉漸公呼起觀雲。則朝曦已挂。連頂少馬紛披走絮。全輸外谷。明淨凝平。踰時不散。晨風忽起。舉若波濤。浪未盡鋪臺下。一洗十年塵目也。自院右趨蓮花峰洞。在其後不及探板。僂陵蹠以杖為命。鵲嶺數百級峻而不險。再閱升降。始至峰下。披一力以登石。反無銜塊。怒躍起。層層環出下。臨絕壑。予以久病新愈。初不計奇險至此。目集股慄。決往乃壯。身為石蟲。入罅復出者數十迴。盤每一憑視。尻踵接駭。礪有廢。

庵曰蓮萼庵上再轉險愈酷石忽中裂一弓許以木架之度此稍折即絕壁斷梯者
二摩膝而登始躡其頂梯半朽懼不敢上聞其上有香砂遙為三嗅而已回顧蒼峰
巖然履底惟天都巖峙若猶俯對其如身非猿鳥不能緣壁排虛以造之有不得不
移尊於蓮花矣雲梯斗栗絕恃一失足即歸無底道蓮花溝穿石弄而上為大悲頂
西進數折迭轉平岡為煉丹臺蓮萼展之而軒轅容成翠微疊嶂芙蓉仙掌卧雲石
牀諸峰紛然離立供給左右楓香繡錦五味如珊瑚盈谷懸崖觸目皆貴遊者於此
得平穩消受目暢神怡而去左後海為天平石下瞰獅子峰巔巔凌空果具全力經
獅子林聞鳥聲亂奏如笙簧意是烏鳳之類有謂遊者時聞峰頂仙樂豈即是乎左
登始信峰兩石分削略約而度接引松揚枝侍客過者忘險峰頭敗板有寒江子獨
坐題名擾龍松傍峰巒異躡石舞空乘風欲去壑競聚美語狀不得口腕兩窮但有
叫絕使予足目未親縱巧語萬端烏能盡信哉降而在為石司砭奇秀絕倫散花陂
對之劃青天數十道矣日已下春急走西海門落照明霞千巖煥彩得未曾有是日
陟降幾四十里一飯之後遂不知餒憊明庵僧以茶果相勞坐定而疲始劇信乎尤
物之移人也次日微雨僧謂白沙嶺山君為政陰霧中決不可行飯後僅一登西海
門校斯延喜無非珍異貪目快心去留真可再宿晨霧則寒風砭骨挾纒尚猶凜凜

從飛來石達光明頂蒲團松偃其趾詭異天成爲一腔六頂居蓮花之背小岫聚如
蓮苞曰九子也顏藍沈於天末曰匡廬也練帶鋪而不足雲氣時欲掩之曰揚子也
白嶽片巖亂山寸綠兒孫臺隸紛擾後先摩廓之觀舍此更何問哉下奏雲谷計里
二十出入層壑如少年作新婚別步步回顧至兜率庵趾眾峰一聚又如良友祖陽
闕旨後但望旌竿縹緲而已白沙嶺脊虎跡踰盤大腥風逆人毛骨皆豎仙鐙洞近
其側不敢復問芒草掩蹊叢篁佐之以袖擁面而行前後不相覩數步一呼如此五
六里躡澗出谷始爲擲鉢庵即雲谷也噫殆哉庵面鉢孟峰兩源夾之澗中亂石礪
何大者數丈涓流鳴也亦殊有致時當秋涸雖未覩舞雪拖紳想其壅遏弗達之勢
必雷驚海簸無疑萬壑奔瀉作如何支遣也九龍潭綯影全收沈碧數掬耳聞道遙
溪亦涸遂不往三宿庵中再入桃源一浴而別計日者六歷峰十餘後海荒寂惟慈
明石鼓二庵遊人不能久住松谷一路堙塞無從問道且多虎豹之虞僧言有龍潭
五六古藤甚奇諸洞多可觀布水雲外一帶蒼鬱特甚翠微西臨孔道憚於陟嶺亦
俟後期盡付神遊讚歎耳僧又言夏日雲滿海中忽湧泉若柱破雲直上須臾遍兩
峰頭而義馭皜然無翳亦一奇也春時合草秀情異卉多不能名峰間翠鬣寸寸皆
有喜色而雪月尤爲奇絕然蘊藉迷徑凜冽刻肌皆非所宜惟秋爽堪遊恨予不見

月耳約略此山如紫雲堆空巨靈以鐵帚掃之神敝鬼迹莫可倪絜前海巖峻尊貴
後海靈詭森奧以文殊院為眉目煉丹臺為肺肝青鸞紫石雲外翠微紫雲飛龍仙
都上昇皆其衣裳劍佩光明頂則切雲之冠雲門桃源其外戶也鐵骨棱棱別開神
貌亦奇亦正無峰不熱武夷具體而幅幅減五之四台蕩宏拔而膚倍之第不識
匡君何如耳雲以鋪海為異而石間松上雨後旭前族擁孤征變幻萬出似有造物
主之者松受雪枝皆仆結鬣平如割幹不勝雪則虬屈怒湧故多奇詭石理粗厲不
潤若大才作經國文章但標神骨而字句工否本非所計故或羣拔為林孤騫為柱
如堵如削不麗不附而藤樹之蒼鬱紫氣之蒼茫又非毫端所能點出當其躍虛巉
積受趾不浮似招游客以盡其奇砂滑如珠又若拒客而留其縕均足賞也昔吳古
梅諸人遊此山不火食者三日至今豔其清狂予輩當表靈闡秘之後不能盡探厥
有良用深愧昔人矣是記也非足以記黃山聊以記吾之遊黃山也如此

程孝子傳

予少時則聞族長老稱說嚴鎮程孝子云且曰吾甥也迨晚交密谷始知為孝子子
孝子之母實予族王姑密谷述孝子事未嘗不泣下浪浪懼慙行無聞也予因質之
亘史所載孝子合葬兩世墓銘而為之傳孝子姓程氏名士章伯達其子世為歙巖

鎮人生未識父。父嚴註以太學生操鹽筴。開種遼陽外。未幾卒。所交馮都司者。葬之高達子阡。付牒守焉。命蒼頭識其地。而歸訃。於時孝子生六年矣。母王得訃。慟幾絕。孝子亦踊絕如成人。其祖拊之曰。兒至性如是。他日歸骨有望乎。蓋姑語慰王耳。孝子聞即輟哭。瞠立問遼陽道人。責異之。厥後母一哭。孝子輒數日不止。母欲發聲。而孝子已顛頓不任矣。母用隱痛不敢泣。恐傷孝子。孝子則時時察母眉睫。為野哭。聞者皆歎為天篤。云註故個儻士。挾奇走萬里。將以功名奮邊塞。絕不為家室計。註既歿。一老暨王相繼厭世。案如洗矣。時孝子年十二。託孤族父。聞人君房氏。君房多豪舉。而性乖僻。孝子稍長。惴惴懼不立。王前已為聘鮑氏女。既受婚。乃辭君房去。謀之比鄰。龜將為父歸骨。龜語孝子。遼陽八千里。徒御風而往乎。因言之方司徒。任子以巽而授計焉。以巽心重孝子。嘗語人。吾當成其志。孝子用是依之十四年。清夜飲泣。無間也。適以巽暴卒。孝子大慟曰。天不欲吾歸父骨。而奪方公乎。吾所以忍隱歲月而苟人世者。凡為吾父故。公既逝。吾無以生為矣。巽子士達。慨然曰。父志也。諭諸同志。而身獨其半。以三百金假孝子。孝子感泣。遂辭行。蓋是時蒼頭可法八十猶健也。挈之從孝子附舟入漕。夜夢天圻。若有神謂之云。覺而水發舟中。眾譁莫措。孝子泣禱。水忽退。舟眾勿測。至直沽發裝。則魚首鼓競。謂孝子異人。不知孝子為孝子也。歷

八月始抵其地。訪高子。已久下世。主僕皇皇莽曠。一路人脫法不去。法就詢。則高之世勳。故童時執役。註者因相持泣。出牒證墓所。孝子具棺啟窆。則儼然冠服。眉鬚也。伏之。匭再拜起。遂失所覲。惟聚骨而已。孝子以生未識父。不敢誤。萬一啗血濡之。良然。手其骨。諸指如或撫之者。集而失一膝。孝子匭曰。是其安之也。忽巨蛤吠不已。且若飛物焉。視之。即膝在也。易殮。以一贏載骨。南道山海。贏蹢躅不進。孝子持註出關。故符焚而號之曰。父可入關矣。彼若掣而贏從入。自是道無留。凡四月抵家。未至一久。孝子妻鮑夢偉衣冠丈夫。偕王坐堂上。明日註骨至。合王葬焉。

廣乘樵曰。以予狹目所識。昭代尋親者三。劉謹王原趙重華。然皆以父在。孝子生未識父。且既死而骨萬里。方輟哭。問道察眉號野時。其天厚矣。彼獨知有父。違計死不。委命他人。借力酬志。方生錫類法勳。天遣使數者。不值吾知。孝子必終歸之。天其忍困孝子乎。卒之萬里邱首。尤偉三子哉。人之所定。天則從焉。誠感魚鼈無足異者。至顯貌完勝。掣鮑夢鮑。其固然矣。密合益振厥德。萬石流風。孝故倉浪所念。要亦有本。野無金管。淪沒何窮。亦吾黨之責也。運之降也。性之失也。巢境虎豹之號召也。吾於傳孝子而為之。勢集矣。

吳虛鑿小傳

虛壑吳氏名懷始安人。早喪母。從父寓齊公南雍。故所習多吳越士。吳越人喜驚虛聲。小見才穎。輒欣然傾蓋。日以文事相譁噪。其有凝重遠大者。雖謬相推與。而心目為鈍。虛壑沈毅寡言。以經世自負。世所稱願慕樂。皆非所好。凡為文。非有關不可作。又真率。多爾汝呼。以故落落鮮合。甲申三月。寓齊公在京師。護其故人某公喪還越。未幾亦卒。虛壑遂孤身狂走。西登嚴子陵釣臺。默坐竟日去。乙酉春。予游天姥獨踞峰頂。有風自東北來。山谷鳴吼。亂雲如擲。絮偶諷李白句。失聲長號。虛壑聞之。曰。是吳為者。循聲而至。相見則大喜。一語連日夜不休。自是浙西千里名山大川。毋論昔人伐木扣舷之地。即古今共棄人所不道者。予兩人無不歷險窮支。指顧點畫。往往落日孤峰。徘徊不去。時有將生者。從予遊。每佳處輒為吟咏。以示兩人。但顧笑而已。將生竟不得意。趣所在。月餘先舍去。虛壑乃出所經山川險隘。遠近諸圖。數十縑示余。余以各得辨證之。虛壑復大喜。酌酒慷慨謂余曰。子有父兄在。非可同予浪遊。予將舍子孤往。可憐吾懷。熱骨寒泉無恨也。未幾。虛壑去。去而復來。來又去。數載始聚。予曰。可已乎。曰。未也。又忽去。後予遯於禪。聞虛壑在吳。吳中人莊事之。有以詩文贈質者。一目即棄去。竟無一語。諸人則曰。置酒擊鮮為奉。虛壑傲然曰。爾將尸居吳懷耶。竟馳去。詣余。余固止之。而虛壑自是亦倦游矣。復慷慨言曰。昨過張長公。見其鬚

髮盡槁。夷山又採芝無耗。二三故人。所存唯子。予胸書雲。然倘得窮谷一椽。書數卷。吾與子作今年聚。友人曹生素聞虛壑。不得見。予與謀之。則大喜。以書數千卷餉虛壑。且修朝夕供甚殷。虛壑受之。若素相晤。曰。目眊坐而已。曹生益敬之。不辰。既得虛壑語。則大喜過望。生常自命酒狂。其於虛壑。則如此。乃謂子虛壑奇男子。既鮮兄弟。不可使無嗣。予語虛壑。虛壑良久曰。必貌陋無一能。非處女則可。生不測所謂。予曰。第從之。得曹氏女。曹適洪者。妾自既拙。僅能事中饋。聞則兀坐如立。櫺子過。虛壑虛壑必聯牀夜話。往往達旦。曹生亦時時來聚。杳不聞帷內聲。食具即自供。午夜炙酒。淪茗不倦。予因數曰。此真吳虛壑婦也。始虛壑喜讀史。遇事不拘成迹。多以意區制。其間時作一二語。輒出古今常局外。聞者莫不愕然。然東西狂走。不恆厥止。至是益肆力焉。嘗於夜讀有感。撫案痛哭。聞窗外有物突騰去。蓋薄作摧裂聲。數數動。人次日見。雞下虎跡。大小不一。谷口農家犬豕。皆為虎攫去。虛壑貽予東云中。夜忽感舊遊。放聲一哭。林間葉落不已。山婦執壺起立。助予哭。聲震空山。虎豹聞聲。避去。此時况味。恨不得王生共之耳。予賦空山哭紀其事。又數月。虛壑竟去。楚期以次春。還不至。前所從遊將生者。有故人自衡山歸。言虛壑卧病山寺。予念甚。屢於夢中哭之。又越歲。竟不至。亦無從通一字。復有識虛壑而自楚來者。曰。聞有狂生久病山寺中。後

不知所往。或云虛壑已歸粵。或云仍在衡永間。予曰虛壑安所歸哉。殆死矣。其婦還依母。則猶曹生授餐也。

不庵曰。虛壑才氣沈雄。視一世事無不可為。而所為輒不就是。豈其人之過哉。夷山子有言。使世無虛壑。宇宙亦大無色。則所謂業必建功。必成者。雖今古推之。要非夷山所許矣。夷山既同夢鶴。張長公又病如霜。蒲子復焚棄筆硯。倘一旦奄逝。誰更知有虛壑者。因大筆為小傳。而於筆之所不能傳者。則亦任銷沈於終古而已矣。其鄉人張湘山。於予亦素交。乃因蹟又過之。豈西粵之山川鍾降。固必如是耶。感念生平。能不為之長慟哉。

談仲和紀事

談仲和者。名尚都。上海人。本名家子。高祖彝庵。倫官至少司空。仲和初業儒。一試不偶。輒棄去。落拓江湖。縱酒自快。其族王父大京。兆自省者。別居京口。乃往依之。京兆以其廢業。弗之顧。仲和退與諸少年從事。弓矢孫吳。略藝既精。復棄去。再詣京兆。與語奇之。時中丞王司馬張公撫吳。適流氛漸逼淮泗。大徵武於民間。京兆使就選。得上雋。擢置吳淞總戎。許自強部。俄而操院吳公閱武海上。拔署右營把總。所轄三百人。皆素戢。無法紀。仲和既蒞事。整其部伍。煥旌砥礪。朝夕訓練。有肅然莫犯之色。過其

營者但聞衣甲器仗聲然。御下雖嚴而廉潔自守。撫恤深至。故多樂附之。為人短小精悍。膽力雙絕。軍中號為談短海寇聞之皆遠避。崇禎壬申秋賊犯安慶。張公檄調自強進剿。是時仲和給假留京口。所知自楚歸者知賊氣熾。謂仲和毋遽募仲和謝而歎曰。君輩安足語哉。洵爾則朝廷需我何賴。常恨東海無足相展。今而遭此誠畢志之秋也。乃遂往。自強以五將為前鋒。仲和與焉。至潛山營未定而報警。仲和單騎往偵。賊偕奸民徐朝兒數十騎自塢間出。大呼馳之。賊皆披靡走。唯一騎甚梟健。獨當仲和。始合即擒之。則朝兒也。先是朝兒數引劇賊深入為患。大參王公見縛至。乃大喜曰。去此導賊目眇矣。磔之於市。居民爭啖之。賊聞氣奪。後二日至宿松。賊眾大至。時未朝食。前營游擊張其威者先與五人列恃其勇獨率所部。住過於雙板橋。賊銳其全部皆陷。眾遂大潰。仲和以數騎衛自強。殺追者十二人。始得免。賊去。張公錄諸勞者而僧輩已列名上。竟遺仲和賴公素聞之。詰所上得實。還劉河把總矣。酉夏賊復來寇。張公調守桐城。仲和至。整練如首嚴。加巡警。賊號曹操營者悉眾去。徐經四日過始盡。時居紳阮大鍼偕令楊某議棄城去。仲和持不可。比賊來。賊皆相怨。尤仲和。哂曰。吾在也。城中奸輩夜半驚眾布以詭得者。仲和擒而斬之一。城乃安。賊既不逼去。或謂其後輜重可截而獲。仲和亦不應。賊退。居民爭齎牛酒詣謝。皆曰。談公

所生也。駐數月，仍歸劉河。未幾，為妻族所誣，事白，遂棄官歸。去之日，行李蕭然。至今所歷諸地，多說談短云。

咎史氏曰：仲和多技能，善持論，彬彬可近也。雲間所珍談義，即彝庵叔之。其法中絕。仲和探而會以己意，妙踰於昔。一時翰墨所宗。如董宗伯、陳徵君等，翕然稱之。均謂風流儒雅士耳。孰知其握粟生風，躍馬飲血，哉！獲盜嬰城，其才可用。然竟以註誤自廢，食貧老死，俾懷才之士聞之，氣短。故予慨而紀之焉。

黃孟通紀事

黃孟通，名憲，華亭人。少即無賴，年十三，誤殺人，逃之嘉定。日糾里中小兒為博戰戲。一日，羣聚大塚間，命羣兒列於前，獨坐石臺上，指揮叱咤。有老人睨之曰：「孺子，喜是乎？何不從師？」孟通怒欲毆之。近輒顛仆，遂拜於臺側。師之盡得其技擊，常附一商舶。舟人盜也，縛其商沈於水。語孟通云：「汝自投死耳。」孟通視諸盜中一人持大斧，掘其因偽伏哀請，遽起奪其斧砍之。盜墜水死，餘皆驚遁。孟通起商於水，得不死，操觚急去。易舟匿蘆葦中。羣盜跡至，不得乃免。商人以百金謝，不受去。既復以殺人下獄，暨得此乃從吳淞千總張喬興挾鹽徒出沒海洋。喬興賤孟通潛避太倉，值觀察沈公選將林拔用劉河中港。孟通矯捷過人，每從橋上窺賊，能相去數丈，持刀躍入賊舟。

格殺之。賊覘知孟通即避去。又常入嘉定訪舊。已醉卧。主人憑程訴其仇。孟通默無語。數以空拳擊牀。既得其里居。曰。吾欲睡。卿可去。主人去。孟通踰垣出。及城復擲。越抵所讐之居。急叩門。以他事引。出拳殺之。明日傳某死。主人奔告。孟通謬相稱決。竟不言也。賊犯安慶。孟通從總戎許自強進剿。宿松之賊自強僅以身免。孟通獨將三十騎縱橫賊隊中。歸而備兵。使者馮公奉巡撫張公命選將材。孟通復就選。諸藝過人。而不諳策論。視平日之能文者。奪其策以獻。遂得第一。謁謝時。馮公稱其文武才。孟通以實告。公益喜。曰。此即英雄舉動也。白之張公。公已前聞宿松故。因得授把總。後以訐某副將貪污於督撫。為自強所惡。斃之海舟中。

塔史氏曰。跡孟通之始終。蓋一無賴子。然其事母孝。同官有親友入室者。即怒絕其交。則固血性男子也。獨惜教未之施耳。孟通嘗為人語曰。朝廷大僚享高爵厚祿。誰為出死力者。如憲百夫長耳。然自念無愧於心。嗚呼。此予所以紀之也。

龔勅庵墓誌銘

以直道取友於太倉。得二人。曰曹一庵。龔勂庵。一庵學醇力厚。人見其是而不知其直。勂庵直致所性。人稱其直而不知其學。一庵歿於己未。勂庵歿於癸亥。年皆六十。七將無行齊者。其年亦齊耶。予前誌一庵墓。不禁為世道慨。門人龔秉直為勂庵猶

子再拜泣以狀請曰非夫子無以不朽世父也予辭不可乃為之誌按狀君名曰煜字德章太倉州人自宋侍御公將縣於連吳十六傳曰今衡者為君之父至仕藩幕以母老乞降秩就近為烏程縣丞三十一而卒君時年十四下有三弟僅僕內叛強孽外侮踐更之吏登堂如豺虎君奉母王孺人教指柱折衝有成人之目且攻苦於制藝弱冠列諸生文舉籍甚張公西銘置之門社中宿望如趙我完朱昭邑諸君皆願為忘年友君既幼孤歷多艱才氣踔厲風發復剛介嫉惡遇事輒以義為斷尊行親屬未嘗少委蛇曲徇指挾過失時令人不能堪追思之必共服其當至趨人之急排解紛難雖疏遠莫不身肩勞怨而曲為之濟嘗醉謂一庵使我得綰青墨綬撫循擊斷宜遂讓與黃獨步一庵曰君誠其人也君事親孝篤愛諸弟姪以母苦節未旌恆拊膺痛悼每及幼年家難事輒潸潸涕不已曰非母氏何以有今日因自號幼庵其後既得旌猶以不及見為恨弟姪病視之不解帶必疾瘳乃已否則如以身受之尤重先祀一遵朱子禮忌日必素衣冠屏酒肉曾祖梧亭公所建宗祠壞謀諸宗老更立以續先世賢哲康更祀酌定科條儀節以垂後維遠生平以朋友為性命然義理之辨至嚴不妄交一人晨夕與遊必先輩典型族之柔濡者護之僕之號悍者制之道路飢寒患難顛沛者衣食援拯之直行胸臆人無不感服者性好學至老

不倦尤致力於史。謂必使吾身可見。晚讀顧宛溪方輿紀要曰。此後學津梁典衣為楮墨費。謀備副本。未及半而卒。要東講學席為海內推。有詢之者。笑不應。蓋其性情之所發。內不計身。外不計世。不復知利害得失。獨行其所安之。是真有天下為家宗族一人之懷。末年貧病拂逆。而其志不改。予嘗語一庵。是即三代直道矣。卒之日。諸友哭皆慟。靖難時。有金川門痛哭投戈者。早歲顧識其子孫。實為君九世族祖。君即守文無一長。吾不能無念。況其人若是。予可假之數百里之地。以守令自效。居常必能轉世。趨遇變則必如常山。睢陽之死義。惜其不為世知。竟作比戶儕死也。一庵已往。吾更誰問哉。君生萬歷丁巳。娶陸氏。繼曹氏。一子秉恕早卒。以叔弟曰煌子秉謬為嗣。後奉母命。又抱季弟熊長子秉正並子之。其仲弟名曰燦。秉正亦前卒。先是君嘗病篤。秉正籲天及城隍之神以求代。人無知者。將殯。若有所見。始微及之。君慟幾絕。秉直即秉正弟。孫三人。素貴已貴。秉謬出良貴。秉正出君卒時良貴方七歲。引刀欲自刺。相從予聞之為泣下。夫大人者。直行其赤子之心而已。觀於良貴天良益見君之直道為不可及也。銘曰。

生理直性所治。率天良無更計。物欲起失其智。是非淆顛倒置。直則明不可蔽。直則剛行必遂。繫躬庵挺叔季。則三代可無愧。洵能臣必忠義。學自造才弗試。此直道詒

萬世宜子孫永不斷

論官祿

黃晉良

聞讀貢禹上武帝書云。臣為諫大夫。俸月九千二百。廩食大官。及為光祿大夫。俸錢月萬二千。祿賜益厚。家日益富。又見蓋寬饒為司隸。俸錢數千。半以給吏民耳。自言事者。然則官至光祿大夫。歲得俸錢一百二十金耳。使自足為已富。且司隸俸僅及其半。而又分給耳目言事者。未聞有不足之歎。事治民安。賢良輩出。何哉。得無時代近古。用度不雜。即公卿大臣。絕無交際賄請之事。賢者固安於為賢。不肖者亦有所制。而不敢行私。加之以儉。易於自足歟。及至成帝時。益大司馬。大司空。俸錢月至六萬。御史大夫四萬。時愈下。而祿益厚。用度益廣。而人才益鄙矣。唐初制祿。正一品米七百石。錢九千八百。正二品米五百石。錢八千。正三品米四百石。錢七千。大率如此。而貞觀永徽。人才之盛。不可枚舉。至大歷中。權臣月俸有至九千貫。刺史無大小。皆千貫。故元微之悼亡詩有云。今日俸錢過十萬。與君營糗復營齋。白樂天典校詩亦云。俸錢萬六千。月給亦有餘。校書小職也。月亦萬六千。其後羣枉迭興。遂至侈靡相尚。貨賄相傾。往往挾外以重內。尾大不掉矣。原盛衰之際。豈不由爵祿哉。雖然。此猶為朝制言也。從來小人祿薄者。心競祿厚者。心侈。馴至流而不可制固矣。今則不然。官之崇卑大小。其能否視乎得錢之強弱。一概絕口不道俸祿之事。而一取辦於民。

間甚至錙銖未便則以府藏為外幣公聽並觀習以為常不足慮也何則恃有取償之術不害於其身也夫以區區遺黎淫者於此取侈焉弱者於此取力焉榮者於此取志焉辱者於此取助焉銓叙於此整齊焉色笑於此休暢焉喜怒於此和平焉功烈於此爛漫焉千古於此破格焉一代於此備材焉嗚呼盡之矣虞書之命禹曰予欲左右有民夫古者有民今者無民古之治天下而制爵祿命之曰並生今之治天下而制爵祿命之以民而已命之以民夫何事而不以民哉然且孜孜然如傷惻忍之言盈堂皇殿亭里獨掩耳以聆其聲豈不甚可痛哉詩曰維南有箕載翕其舌維北有斗西柄之揭杼軸其既空矣如此瘴人何

白雲鄉遺稿序

吳騏

金辰張先生歿二十年。予是瀛哀遺稿若干首。以授其友吳騏。而俾為序。騏愧勿文。念與是瀛深相知。何敢拂其仁孝之志。故為序曰。先生為華亭庠生。世居邑之高橋。地瀕大海。俗務魚鹽稼穡。人文閤寂。自制舉義外。不聞有聲韻事。先生不藉師友匠心。獨得上規晉魏。下採三唐。所著詩數千言。氣昌以遂。詞麗以達。體安而節。和音婉亮。以清哀而不傷。一時名家未有過之者。顧抑鬱諸生中。未嘗一遇。困於踐更。歲輸賦千餘石。至京師。往返八千里。家益以落。時值東鄰告警。三帥敗績。逆閹竊柄。朽索不馭。仰觀俯察。瞻烏靡定。憂結成吟。歿於旅邸。年止四十有八。可謂至艱苦荼毒矣。然以今日視之。則先生所遇。未為不幸也。夫病者勢至貼危。而子孫倖存。操樂雖知難起。猶有萬一冀。一旦綴舍浴鉅。慟踊滅性。求為曩者。嘗樂時不可得矣。先生所遇者。猶留之世也。今騏所遇。則升屋三號。而魂不復者也。大故以來。舊家百不存一。子孫顛踣。無以善後。獨先生倡起風雅。而是瀛能大其學。赫然有海內名。又梓先生之詩以垂後。是天下大亂而一家獨治也。可不謂幸歟。騏觀是瀛諸子。雖賢然其材無及是瀛者。則是瀛之遇已不如先生。騏年且四十而未有子。則騏之遇又不如是瀛。騏尚生存。豈無遇之更不如騏者乎。昔我郡徐中翰子式。酷嗜音律。竭一生心力。著

九宮譜今其本在婁江。而子孫不知有是書。夫以子式視先生。豈不富貴且壽哉。而心力所存。子孫視為敝屣。因念古郭威之徒。以匹夫致萬乘。一旦晏駕。而無血允。曾不若牛醫夏畦之有傳業。夫英雄百戰。以有土宇。固望有所付託。士人著文章。往往忘寢食。嘔心血以成之。而豈願為後人所敝屣乎。而往往不免嗚呼。人固不可無賢子孫也。

林武宣貞娛草堂詩序

詩固才人所以自娛也。然可以困天下之士者。其五言古乎。近體門戶既廣。取材亦易。在唐已有中晚矣。若降而為宋。則歐梅蘇黃。簡齋務觀。用事不必選擇。結構都無定體。有才者恣其放縱。而拙者亦得容其下劣。其體無所不受。故世每淵數焉。若五言古。將何地自容乎。五古推漢魏為絕調。字有原本。雜一字不受也。句有體裁。雜一句不受也。字皆樸實。而句反奇逸。句多健直。而篇反委婉。思沈而聲揚。體靜而氣流。盡而有餘。去而更留。學之者得其膚貌。未得其音節。得其音節。未得其神氣。非屏息淵思。曠時累月。不能悟入也。夫才人所謂屏息淵思於制舉義者。冀其厚償我耳。五言古不足取富貴。而精微深窅之思。與制義相彷彿。春秋多暇。繁英皓魄。飲酒賦詩。本求快意。何至自苦。故學之未竟。往往中倦。甚矣五言古之能困人也。而武宣乃獨

以見長蓋才高故力不踰學運故體不混靜侯而不躁故神氣涵浹而無所勉強其為古也非如昔人所云句櫛字比以求其合也正復還學識出議論而渾融閒曠無跡可尋聲光神理自然入古天姿無其矩矱而人工避其變化安得不推為獨絕乎其五七言律詩五七言絕句七言古詩俱高華響亮然世之才子猶可鞭弭索綯相與上下若五古殊莫可爭勝故予獨三歎焉

馮氏譜叙

譜牒之弊有五曰偽曰隱曰損曰益曰誣吾嘗見山東某氏譜矣祿取二十一史列傳所載為世系於是有父事南朝子家北國子起卒伍父業儒宗稽之正史支離背戾又見新安諸譜不指史氏而自撰爵謚誤謬可笑所謂偽也林文肅見素曰閩有楊氏實煬帝裔裔諱而不言新安許氏言及睢陽守則應言及敬宗則默夫善惡雖殊而世系難改欲為簡擇遷就亦惑乎此所謂隱也宗支既盛貧賤者亦復不少慶弔不通修譜者因鄙而遺之所謂損也崛起者願附舊族而中落者竊祖先以邀利兩相假託各自為榮遂有合兩譜為一者所謂益也朝臣忠佞在國史士庶賢否在鄉評乃有虛立褒詞貨邀志傳所謂誣也讀吾松馮氏家譜而五弊皆無之馮自春秋傳馮簡子能斷大事其姓始著後百餘年而韓滅鄭馮氏因仕韓上黨守馮

國朝文匯

卷十七

二十六

國學扶輪社印

亭蓋蘭子俊也亭子孫相於秦外戚於漢帝於北燕燕之裔浮海入南侯於南粵者
歷梁至唐宋有京極明有國用勝晟至顯赫矣然譜不遠引惟就世系可考者載之
自元末以暨近日家墓皆可指數未嘗以無為有以有為無也是我宗者雖微必錄
非我宗者雖貴不登世俗勢利之態庶其免矣而慈母孝子忠臣名士皆國史所具
子孫不敢有溢美焉可為譜牒法者其在斯編歟

左傳濟變錄自序

謝文海

處國家之事。惟變為難。得失成敗。恆在幾微呼吸之間。使闇者當之。惘惘然莫得其方。神亂氣沮。一再躊躇而大事已去。智不足也。智稟於天。而未嘗不得之於學。恃天者。每有奇中之能。然事遂功成。往往以不善居而貶。智於始而闇於終。有足悲者。惟得之於學。以勇則沈。以養則邃。遇事不震不徐。而適投其機。功成之後。又恬然若未嘗有事者。雖有猜主妒相。而不暇以隙此之謂大智。大學明理於經。而習事於史。史於學居十之六。而閱歷煅煉。又居其四。事變無窮。莫可究詰。然能舉古人之成案。精思而力辨之。置身當日。如親受其任。而激撓衝突於其間。如是者久之。則閱歷煅煉。已兼具於讀史之中。矧身世所遭。得之於動忍增益其力。又有大焉者乎。以此知得於學者全。而得於天者半。身任天下者。烏可無智。欲智又烏可無學也。游生也。闇幸而天下事未嘗及身。年已望六。可免廢餽之恥。賤貧多暇。授徒左傳。見其持名卿大夫。濟君國之險艱。識深力堅。誠有不可及者。因國取數事評註之。得二十八篇。又余友魏裕齋有杜預癖。深謀秘計。一一摘抉於字句之外。發從來讀左者所未發。輯左傳經世一編。而秘不輕出。予得竊窺其五篇。而逸其一。其四則全錄。其評鍾氏伯敬之言。亦時一錄之。夫以余之闇。又老且賤。安能與一時英少。抵掌談天下事。惟是取

古人陳迹神而明之以補天所不足。雖不傲之實事。庶幾心目開朗。俾不至於闇終則厚幸矣。乃若明體識用之學。非全力不足以幾。自其學以至於立。立而至於權。不容凌節而施。亦不容畫地而限。夫學至於立。則窮不失己。達不離道。似亦可以自畢。然使時勢安常。則以立者居之有餘。一有變故。非權曷濟。故學不至於能權。則才不足以御變。天下事既以身入其中。能保其有常而無變耶。至於立之未臻。而急於用權。則將以利為義。說遇思獲。此又豈聖人之所謂權者耶。春秋時諸名卿大夫之權。未必一一不謬於聖人。惟是學之有道。則變化在我。雖以小人智。盡如烏菴亦未嘗不可泡而製之。以神吾生人之權。得是意而推之。將博觀全史。以盡古今之變。區區守一左氏。猶恐不足以濟吾闇也。

導問

彭師度

用兵之道戒太銳戒太怯。魏信陵以魏救不出欲以身赴秦軍。侯贏謂以肉投虎耳。卒賴其計而止。此太銳之可慮也。桓元與劉毅戰於崢嶸洲。兵威懼有敗。先漾輕舸以自隨。此太怯之無功也。兵機無定。貴在因敵之勢而用之。如性疾急而可以怒挑也。曹咎之守成。臬漢王使使辱罵之。而遂渡汜水。與性迂緩而無大略也。宋襄公戰於泓。不鼓不成列。必待敵渡而擊之。傷於股矣。善將者能使敵將之性情。敵兵之強弱。瞭若指掌。此非用鄉導不能。譬如從禽者。若無山虞之官。度其形勢之可否。則徒入於林。不能獲鹿矣。出兵者。若無本鄉之人。導其道路之迂直。則雖至於境。終不能獲寇矣。夫以奉辭致討。趨險未歷之地。我孤軍以往。彼鱗次以待。客主之勢已相懸矣。況其專任詭譎。多方以誤我。可不計而直進。冒危而長驅。盡行則有暴來之闕。夜止或虞斫營之兵。倉卒無備。落其彀中。即有熊虎之師。自投死地。安能摩逆壘。蕩拔穴乎。故山川林陸邱阜之可以設險者。林木蒲葦茂草之可以隱蔽者。道里之遠近。城郭之堅瑕。邑落之寬狹。溝池之深淺。蓄積之豐約。卒乘之多寡。器械之堅脆。兵將之合離。能盡知之。則敵不足擒也。凡用鄉導。或軍行所獲。須防奸細。慮有陰謀。反為誘誤。必在鑒其色。察其情。參驗數人之言。始終如一。乃可為準。既得其人。則厚其餉。

賞養其室家。係心懷恩。當得彼用。若諳練行途。必其土人可任。仍選智勇腹心之士。挾之俱往。則巨細必審。指縱無失矣。既知虛實。便能用間。如韓信之破趙。劉裕之取臨朐。來護之破高。智慧皆以用間而勝。然間乃適會其隙。非可必效者也。惟察敵之道。常得勝算。締疵決韓魏之反。亦以其有憂色。而無喜志。史駢識楚師之遽。謂使者目動而言肆。有懼我之心。此誠見形察敵具深識者。若夫無豫料之識。而欲縱反間之人。結鄉導之路。則惟有推誠厚賞。使信義足以固結。蓋未有不得其心。而能得其力者。亦未有不得人之力。而能自戰勝者。慕容恪曰。軍勢有宜緩以克敵。有宜急而取之。若彼我勢均。且有強援。慮腹背之患者。宜急攻之。以速大利。如彼強我弱。外無救援。有犄角之勢者。當羈縻守之。以待其敵。言兵者。其亦審於太銳太怯之間。而臨敵制宜可乎。

上嚴瀨亭副憲書

某謫為下士。荷先生通家之好者三十年於茲矣。入都以來。頗欲以襍綫之才。侍用於門下。承先生揖之座右。賜以酒食。相見之歡。慰勞之切。意勤懇懇。若憐其落魄。而思有以振之於泥途。蓋未嘗不翹首而思企也。嗣是以後。先生之位日益高。而某之窮且困益甚。色沮氣慙。掃門為而遠致咫尺之間。不啻萬里。然微聞扶掖鄉俊。獎

借不絕口。雖身在疏逖。又未嘗不鼓舞踴躍。歎為盛事也。客况淪落。自傷不遇。無由
屢望清塵。一吐肝臆。茲者失意成疴。渴思還朝。聞朝廷新令。許三品以上官保舉
人才。而先生有薦賢為國之柄。敢竭其愚。冀以冀俯聽。李固曰。養身者以鍊神為寶。
安國者以積賢為道。今中外師師濟濟。不可謂無人。而以憂勤之

聖主。竟不能收得士之報者。用人雜而成格拘也。

皇上怒一方之紛擾。憫百姓之流亡。恐克復城邑之後。兵燹瘡痍。撫綏倍急。故欲得
慈惠之長。忠信之師。以奠定其地。特開保舉之端。不循資格之故。甚盛典也。近聞朝
士意向。仍屬廢棄之舊。老聖誤之遺絀。雖不失人。惟求舊之意。而草茅逢掖。一無拔
擢。豈

聖天子不次用人之至意乎。先生以蓋代之鴻名。當邦憲之重地。其所保舉者。當必
有瑰異之行。奇特之才。久蓄於夾袋中。而某則願有請者。與其保現在為超遷之階。
甯若救註誤為自新之路。與其獎世俗杜雌黃之口。甯若收寒俊儲新樞之用。況已
仕之人。素享逸樂。宜乎黼黻承平。不能經營患難。惟草茅之人。掩抑困頓。其受苦既
深。而老才益練。苟得名位。則必痛自惕勵。以報所知。若其身負瑕疵。不堪蹉跎。又必
力於改圖。以蓋前愆。此必然之理也。今國家令嚴法重。言路有不當者。輒議罷斥。

其畏縮而不敢言者不知其幾若保舉之事得言矣又不暢所欲言而伸拔俗之見又何時而得言乎或以進賢有翟璜之賞不實有王丹之罰苟非生平所素習則不能輕舉即信矣能保於目前而不能保其既往則無所短長之人適足為舉主累耳此其事亦或有之然未可為通論也長吏之事所貴者廉能今則安疆欲其休養所重在廉危疆欲其捍禦所重在能必須委之以事權無人得以掣其肘而後可以盡其才有志之士出於今日必且懷忠肝蓄義膽奮不顧身以赴國家之急又安有敗檢穢行以負所薦乎此有以信其必不然矣然吾聞非常之事必有非常之人起而身任其責不避謗議首先抗言然後所舉得人而黜陟咸當而歷觀史冊亦寥寥其人蓋非無其人而權之所操有專有不專也漢之時田蚡以武帝好文黜道崇儒多所銓敘公孫起客館海內士沛父而進然以董仲舒之醢謹輟歐陽之明經博古申公之篤行並不得推或推而不及顯而其所與推轂者乃出於王臧趙綰之流豈真知人之難哉人情好軟美而畏奇拔樂說隨而惡質直所由來矣先生人倫璣鏡能無破拘攣之見申崇竑之議乎江南奏銷一案罷斥萬餘以分毫之逋欠遭森嚴之重科禁錮數年極重難返雖改業死亡者已多而青年潔行沈困里閭者亦自不乏進士如錢中諧彭孫通孝廉如計東董俞等皆有通明之才可備任使先生能乘

此機會陳其寬而舉之乎。如某者跼蹐鈍朽之士也。罕有攀援時聞謠詠。雖毛義有捧檄之心。而援引無馬周之路。行將策蹇歸鄉。終老衡門矣。辱長者交誼。有教陳其區區。幸不鄙。竊效一知裁察。

後樊川集序

後樊川集者。家鴻臚先生之所作詩也。先生積學四十年。所著詩若文。幾充棟。茲以入秦而名其詩。且以前有牧之。而自遜為後也。其意念深矣。夫人平居里閭。大率皆花月風雲。對酒高會。贈別繼繼之作。所作即工。不過雕繪滿眼耳。其嶽奇磊落之氣。生平所蓄。積非遇山川之奇特。遇合之顯易。得之心而應之手。曷能累業。以至日新耶。所以貧賤之士。其所見不遠。而詩亦終無變格也。若先生之詩。則屢變矣。自己丑游燕越。二年游越。游閩游粵。所遇之川原郡邑。足以增發其志氣矣。乃又游燕而宦粵。西楚南入於烽烟瘴癘之鄉。而彌厲其節。彌發其采。所作安得不工。今復宦秦五。年。長安舊都。八水滌泗之地。觀益大。詩益工。宜其所作。多弔古悲涼。沈鬱蒼嫺。無復作雕蟲技也。昔司馬遷作史記。論者謂其得遊覽之益。先生所歷幾遍天下。而以詩為史。乃如少陵。又以所遇之秦。非少陵比。而比於樊川。豈其有所取耶。先生善詩古文。精行楷。飲酒能談笑。而簿書刀筆之經濟。又能不辭甘苦。其名位殆未可量。彼樊

國朝文匯

卷十七

三

國學扶輪社印

川集又豈限之哉。牧之所著不甚富。阿房一賦亦小技耳。特其不拘小節。有足稱者。吾謂先生樂杜曲之風景。而取義樊川。非謂牧之而後焉也。後世之人。取兩集而讀之。其能以世為前後哉。河渭李楷既為序。不鄙某而命弁焉。爰是忘其固陋。而又弁其首。

水繪庵二集序

予少時即聞雉皋有冒辟疆先生云。暨江南北諸子。各高論者。藉藉有東漢清流之譽。而其間與八厨相抗者。獨推冒先生。家大人為予言。先生個儻豪俠。迥然拔俗。以是始景行其人。顧未知其詩文若何也。後二十年。而予友陳其年稱道勿置。又交其令子穀梁青若。因是得盡讀先生之詩文。并悉其生平。益私心向往。先是先生年少時。凡前輩之抗節樹行。負文章聲者。無不引為忘年交。嗣庚午南闈。家大人與西銘維斗大樽機部諸先生共推一時之雋。而先生於是年頭場入彀。竟以病阻三場。以是善居之。先生惜之。諸先生與交甚歡。精楷書。善談笑。胸懷浩落。義風遠布。不第一時名賢。盡折節與交。而拔引後進。亦極欵洽。生平著述甚多。茲穀梁則以樂民先生文集屬余序。先生交滿天下。自有梅村芝麓諸先生弁其首。何待無陋如予者。顧不鄙而強屬之。又安敢以不文辭。夫自六經諸子以後。惟漢人能自創述。後止因其體。

格互為附和耳。今言文者動稱史漢八大家詩必舉漢魏六朝及開元大盛顧人人能道之。余以為論次其世雖有升降而核其意旨攝其文辭不相待而不相廢也使必舉近古者以為繩范而不能自出其裁以附於百世之後則變化之謂何。當譬之樂矣。異調者同聲異聲者同趣。鏗鉤各奏和平並臻焉。可謂瑟愈於瑟琴愈於枳圓哉。故木芍之與山桃同一豔也。芙蓉之與寒菊同一澹也。今古雖殊文心各勝。一代有一代之音。一人有一人之韻。止搜摭以自鏡仍經營之在心不必限其世次而隨俗附和也。先生卓犖觀書不沾沾一家言得斯旨矣。今其文之麗而澤者蒼而峭者骨勁而神爽者古詩之後朗多風者近體之瀏亮而雅贍者無一不備而大要變化於古而能自為古。蓋先生結交名雋贈答為多洋洋灑灑有六卿賦詩季札觀樂之意。故浸元咀腴穠淡各得而要歸於神雋決不肯句櫛而字比也。先生屢經薦辟何難俯拾青紫而愴然不自得。且以冕黻為徽纆烟霞為窟室用是徜徉於小三吾之下。臨流賦詩倍極慷慨高其德而勿耀哉其功而勿試而一其志於立言以冀夫後世之知我此太史公藏之名山傳諸其人之意也。先生碩德名業既當不刊而令子穀梁青若復世擅雕龍氣誼文章與先生頡頏上下譬前叔之賢允同任遠之令子行且入槐市而抽毫為世大用矣。先生慶衍家閭文雅相紹將來之著述輝煌日益

充棟又豈予獲難之見所得窺威鳳之靈者哉

處士王光承傳

處士王光承以詩文重天下自勝國時業已藉藉至本朝定鼎以來埋光韜采者踰三十年海內不復知有王先生矣而享年七十二歲乃死悲哉士之生不逢時而至於槁項黃馘以老湮沒無聞者多矣先生豈求名者哉雖然以予所聞先生學至博誼至高於文無所不穎而淵然莫露於行無所不備而惕然若虛以彼其才何難烜赫取世資為親戚交遊光寵乃痛心含忍自涸於海雲涌寂之間其志貞其修潔君子哉若人為不朽矣里黨之士死於兵歿於寇率總於妻子摧殘於賦役飄飄淹抑於饑饉何可勝數即蘊才抱畧一藝一德之流始亦堅韌如百鍊鋼而日復一日化為繞指柔耳先生聚生徒教授挾一編自娛至椎髻蓬頭布衣皂帽者終其身非有堅忍之力淵邃之守視一切富貴勢厚絕不撓其心能如是之不污也哉先是先生父君謨名不顯者精學好古為明季廣文挂冠歸隱先生與弟烈先後鵲起為文人居恆敦篤孝友以忠義相砥礪遭亂泛海與父居天台雁宕間志行信於人學者駸駸來就君謨公有故鄉思侍奉還里父與弟相繼凋謝竭力護喪事環堵蕭然不為戚也生平好為人作序時有以文字貴禍者株連頗急先生負重名且以義自處

疑有以此及之者。人言如沸。先生曰。生不喜存。死不悲歿。宋纖之言也。吾若遇難。又何悲焉。自丙戌歷丁巳。杜門者三十三年。夫此三十三年間。可喜可得。可歌可泣之事。不知其幾矣。假令折節而交。濡足以濟。而名業小大。年壽永促。一旦如飄風如蟻壤。則亦死輕鴻毛耳。士固有志。而遲回以驗其守。輒軒以揚其節。天之報施善人。為何如哉。易曰。不事王侯。高尚其志。詩曰。彼君子兮。不素餐兮。王子何而爲焉。乃爲贊曰。維世之人兮。動於心而不自持。賴王子兮。能愛道而貞於斯。天卑地高兮。世莫我知。松柏後凋兮。高名在茲。

辰隋司馬公傳

李煥章

不伏波樓船今諸蠻老夫長內屬守外臣今有其人曩年至京師有自衡湘來者言
反徐司馬撫水順土官事水順土官遠祖隸安濟大為裨將遂世據其地嘉靖時胡
尚書宗憲討海上寇徵其兵戰勝陶宅禦兒港尚書欲以名姝王翹兒賜之奢寅叛
重慶督臣檄渠健兵五百黔江塞奢東出路張獻忠數犯數敗去以故水順益桀
遂黃屋左蠡雄長南渭施溶上溪三土司間矣皇清初王師屯長沙水順以五酋
長屯保靖保靖渠要害也已而弗自安願助兵一隊自大中丞下皆許之司馬徐獨
抗聲曰南服勿靖旦夕定爾奈何藉么麼為聲援今夜郎有輕漢心水順懼斬山谷
自絕郡徐司馬遣漢把住宣慰曰日者大中丞以爾煩擴悍觀望欲移衡永辰常之
在行者深入爾菁谷撐爾牙挈爾庭爾今日無永順矣司馬憐爾力白止之欲命南
渭施溶上溪分爾地七八百里遍給告身擇爾國中之有才者代宣撫離結司馬憐
爾又力白止之今司馬且單騎酉陽聽爾就約束於是宣撫大驚據面縛詣轅門請
納地歸縣官自贖司馬叱曰

聖天子撫八荒愛爾彈丸區耶永順事大定客又言司馬前襄陽理時累出奇衄寇
鄖西諸大帥爭裹旗旂去丈夫哉語未竟景芳泣血趨拜曰辰司馬非徐姓吾父也

諱林字某侍御公長子。余倉皇謝曰。誤誤。外史氏曰。衡湘人呼徐為隋。莫辨也。音聲之謠。豈不微哉。作辰隋司馬小傳。

周夫人傳

周夫人者。山西總兵左都督忠烈公周遇吉元配也。將家子。貌美麗姣好。纖小盈盈。有異力。善騎射。挽弓數百石。讀兵家言。傳李衛公兵法。屢佐忠烈公立奇功。崇禎末。從忠烈公甯武帥幕中。李自成西入潼關。據西安。稱大順王。僭號永昌。夫人謂忠烈公曰。明年寇必渡河。將軍當奏之。朝統兵禦之河上。天下事猶可為也。忠烈公是之不果行。明年正月。寇分四將軍兵出河懷蒲津。自統兵四十萬由長安東。收諸塞上兵。趨宣府居庸。犯京師。蓋譚忠烈公乃自扼當路塞也。是時忠烈公在雁門。聞諸鎮路將皆降。乃擇標兵三千人屯甯武。寇至。忠烈公逆之戰。三大敗之。俘斬數千計。自成驅榆林甯夏兵共攻忠烈公。又大敗之。追戰陷重圍中。奮力格鬪。俘斬愈多。日暮寇已退。馬中流矢。忽蹶。忠烈公拔佩刀自殺。有全傳。夫人貫重鎧持雙矛。三陷陣。入中堅。折其牙旗。斬最驍將。寇大崩壞。莫敢當。自成去。日暮又合圍。夫人潰圍出。標下健兒盡矣。夫人怒。自鞍間提其賊前隊將而舞。寇披靡。自成大驚。退去。陣潰亂。夫人乘亂攻之。所擊殺近萬。然聞傳云。忠烈公已就斃。夫人大呼曰。天乎。天乎。將軍死戰。

何為耶。亦自殺時有一將軍最勇。亦死軍中。史氏並軼之。余來趙城。學博文水武公。君子不妄語人也。為予言其本末。為之傳。附忠烈公後。